

ZAZI LE LIÑOLO

LE LI TALELELIZWE

 Hamuyeme ona cwalo, haiba mwa kona, ha lunze luinamisa litoho zaluna kwa tapelo.

² Ndate Yomunde ya kwa Lihalimu, lu itumezi busihu bo ka se, kolo yeñwi hape ya kutaha ni ku to tisa Evangeli ye kanya ye, mi yende ya Jesu Kreste. Lu itumela ku Wena kabakala kuli U sa li ya swana maabani, kacenu, ni kuyakuile. Lu itumela ku Wena ka batu ba ili baba kopanezi mo mwa nako ya maliha abata cwana aa, mi ba sa nani tibelelo ya bona yetuna, ba talimezi, ba lumela kuli sesiñwi se si ipitezi si ka fiwa ku luna kuzwa ku Mulimu. Lu taha ka sepo yani, Mulena, mwa mukopano kaufela. Lu itumela ku Wena ka lisebelezo, busihu bwa maloba, fa tabernakele; lu itumela ku Wena kwa sebelezo mo maabani manzibwana, ni kwa sebelezo kacenu, mwa tabernakele. Lu libelezi cwale ku Seo u ka bata kuli lube ni sona busihu boo.

³ Ndate, lu ziba kuli mutu kaufela ya kona ku nyanganyisa mazoho a hae wa kona ku apula makepe a Bibele, kono kuna ni fela Alimuñwi Ya kona ku I eza kuba yepila ni kuba ya niti, mi yani ki Wena. Mi, Ndate, lu libelezi Wena kuli u eze zeo busihu bo. Lu fuyaule mwa nzila kaufela. Lipilu za luna litezi hahulu tabo halunze lu bona nako kuli i sutelezi ha lu ka Mu katanyeza, pata ni pata, Yena yo lu latile ni kupilela mwa myaha ye kaufela.

⁴ Buñata bwa baba sa zo lumela, Mulena, ba ezizwe. Ka ku utwisisa kuli nyangela yetuna, baba mashumi amane kamba a ketalizoho, ba lukela ku kolobezwa ka Libizo la Hao, kakusasana, kuzwa mwa sebelezo ya maabani busihu. O Mulimu, shangwe u zwelepili, lwa lapela, kufitela Peu kaufela ya Mulimu ye lelilwe pili ibona Liseli la Evangeli, mi se ikeni mwa mulaka.

⁵ Lu kupa kuli U lu pate busihu bo kwa mulaho wa Linzwi; lu foufaze kwa lika za lifasi, mi tuhela kuli lubone Jesu. Hakube kutwisiso ya Lilundu Lelibanya leli sweu mwahala luna, busihu bo, kuli lusike lwa bona mutu ufi kaufela kwanda Jesu fela. Lwa li kupa ka Libizo la Hae, ni kwa kanya ya Hae ni kwa bupaki bwa Evangeli ya Hae. Amen.

Mwa kona kuina.

⁶ Ni ka sikulula fela maiki ye, kamba sipula se, kwa tuko fela hanyinyani, haiba ki swanelo, ili kuli Ni bone maneku amabeli kaufela a sicaba. Ni sepa Na kona kunga ma maikulofoni ainzi kwanu ka swanelo. Ku lukile, fa nako nyana fela.

⁷ Lwa lumelisa, kuzwa mwa tuyaho o mutuna kwanu busihu boo, balikani ba luna mwa Arizona, California, Texas, ni mwahala United States, ka mukwa wa luwaile. Ye, iya mwa naha kaufela, sebelezo ye busihu bo, ka mukwa wa luwaile, kacwalo lu sepa kuli Mulimu uka lu fuyaule.

⁸ Mwa utwa kana, kwa mulaho kafoo kwa—kwa tuyaho neku la nzohoto? Ku lukile, ba ka tatuba cwale mihala ya luwaile, kubona haiba ya beleka hande.

⁹ Mutu kaufela mutabezi busihu bwa kacenu nji? [Puteho ili, “Amen.”—Mu.] Muli, ki hande cwalo! Kwa neku le? [“Amen.”] Amen. Ni tabile hahulu kubona kaufela mina ha muinzi ka mbombolelwa luli.

¹⁰ Mi cwale kamuso busihu, haiba nji sicaba sizwelapili ku ekezeha, kukaba hape luwaile lo lu tamahani hande. Kuna ni o cwalo busihu boo. Ni sepa kuli yeñwi ya zona iteni kwani kwa tabernakele.

¹¹ Mi, kamuso kakusasana, lisebelezo halina ku ba kwa tabernakele, kakuli ba . . . ba ka lukisa za kufiyela ni kukabisa keleke kwa sinawenga kamuso musihali. Mi ba shimbuluzi li—li sebelezo, mwa kakusasana, kuya kwa keleke ya Muzwale Ruddell, alimuñwi wa balikani ba luna, mi ni kwani kwa—kwa nzila ye kambama kwanu, ya 62. Kana li zibahalizwe nji? [Muzwale Neville uli, “Eeni.”—Mu.] Li zibahalizwe. Mi, haiba nji ku ka yo tala batu kwani, luka nga baba ka siyala ni ku luma mukutazi kuya ku Muzwale Junior Jackson, kwani kwa Clarksville. Libaka lene lu bezi ni yona ku Muzwale Ruddell, kakuli ki fakaufi kwanu, mi lwa kona . . . mi lu hupuzi kuli ne mu ka fumana sani kuba bunolo nyana. Mi kipeto lu ka li tokomela ka nzila yeñwi. Ni kueza katata kuli lube ni likolobezo zani kaufela kamuso, mi Ni sepa kuli ku kaba baba mwanda kamba myanda yemibeli baba ka ekezwa kwa kolobezo ya kamuso. Mi cwale kamuso busihu . . .

¹² Hani tabelangi ku zibisa taba ye ni ka kutaza ka yona nako isika kwana kale, kono busihu bulibuñwi mwa sebelezo, kamba zazi lililiñwi, Ni bata ku ambola fa tuto ya kuli: *Ki Mañi Melekisedeke Yo?* Kakuli, ki—ki tuto ye Ni nahana kuli lupila mwa nako yeo sinulo ye, ili yebile puzo mwahala lusika kaufela, kaza kuli, “Ki mañi Mutu yo?” Mi Ni lumela kuli Mulimu una ni kalabo, ka Yo nali Yena. Babañwi bali, “ki buprisita,” babañwi nebali, “ki mulena,” babañwi . . . Kono ku lukela kuba . . .

¹³ Haibile fela kuna ni puzo, ku lukela kuba ni kalabo kwa puzo yani, ye lukile. Haku konahali kuli kube puzo kusina kuba kalabo pili.

¹⁴ Cwale, lu sepa kuli Mulimu uka lufa mbuyoti busihu bwa kacenu kuzwa mwa Linzwi la Hae, halunze lu Li bala.

¹⁵ Mi mubile ni . . . Billy na ni bulelela kuli mubile ni kutwano yende ni sicaba kwanu ba babile mwa libaka za ku bulukela

limota, mapokola ni babañwi kaufela. Muzwelepili ona cwalo; ki nto yende, yende luli.

¹⁶ Lu sepa kubona nako, mwendi kwa pili nyana, mwendi ha lu ka tisa tende mwa muleneñi wo ni ku ibeya kwanu mwa libapalelo la mbola, ko lukona kuina ka nako ye telele cwalo, mwendi ka lisunda zetaalu kamba zene, ancafazo, ku swalelala. Mi kwanu halukoni ku zibana ka bunolo, mi kipeto lu swanela ku bulela kuli siyala fo mi lwa ya hape. Kono Ni tabela ku taha ni ku to ina fa musipili o mutelele cwalo, nako yeñwi ko mu ka ina kuli ha lu na ku kwala mwa busihu kamba amabeli, kono ki kuina fela ni kuluta, musihali ni busihu, musihali ni busihu, kuswalelala ona cwalo. Mwendi mutu uka ya fela kwa lapa ku yo fepa likuhu, ku fulisa likomu, ni kukuta biki ye tatama ku to zwelapili ni sebelezo. Na—Na tabela sani. Kacwalo Mulena ami fuyole.

¹⁷ Cwale, Ni si ka ya kale, mwendi la Sunda kakusasana kamba la Sunda busihu, kamba taba yeñwi, yeñwi ya lisebelezo ze, Ni ziba kuli kaufela mina mu libelezi ku utwa Liñusa ka Niti kuamana ni *Linyalo Ni Telekano*, ili yeñwi ya matata amatuna a lizazi la kacenu. Mi Ni ya sepahala fela sina ha Ni yemi fa, Ni lumela kuli kalabo ye lukile ifumaneha mwa Linzwi la Mulimu, mi Ni lumela kuli seo kona se Ni sepisa ku kutela ku sona.

¹⁸ Mi Na akaleza, ka kuziba, kuya ka mo Ni zibela, Ni bata kuba ni sebelezo kwanu kwa Jeffersonville, la Sunda ya Paseka, mi luka... kwa sebelezo ya kupazula kwa lizazi, ni Sunda ya Paseka. Kacwalo luka li zibahaza ka ku itahanela mwendi ni kulika kuba ni muyaho, haiba ku konahala, kamba kokuñwi, kala Sunda, mwendi kutaha la Pelekelo ni la Sunda. Ni lukela kufufa kutaha ni kukuta, kakuli seli bukaufi ni nako... Ni lukela ku itatuba, pili, na mukoloko oni Nani, mi iliñwi ya—ya—ya musipili wa ka mwa California. Mi cwale, kapili kasamulaho wa zeo, Ni lukela kuya kwani mwa—mwa Africa. Kacwalo mu ambolisane mi mu lu lapelele.

¹⁹ Cwale, busihu bo, Ni bata ku bizeza kutwisiso ya mina kwa siemba sa Linzwi la Mulimu, le li fumaneha mwa kauhanyo ya 4 ya Muñoli Luka. Kauhanyo ya 4 ni timana ya 16, ika kala, Jesu wa bulela.

... *Zazi le Linzwi le litalelelizwe mwa lizebe za mina.*

²⁰ Cwale lu bata ku zusa, ona Mwani, muhupulo wa mata a Linzwi la Mulimu! Cwale, kaufela luna lwa kona kuba ni libelekiso, kono si lwala Mata kuli Li beleke.

²¹ Lwa kona kuba ni libelekiso za mushini, mota, kono kanti si lwala mata kuli mawili akale ku sebeza ni ku zamaya.

²² Cwale, Jesu na kutile kwa—kwa Nazareta, kwa Na hulezi. Cwalo mwa Mañolo mo, lu fumana kuli ne ba bulezi kuli, “Lu Ku utwile ha ne uezize sa *kuli-ni-kuli* kwani kwa Kapernauma. Cwale ha lu bone U li eze mo mwa naha Ya Henu.”

²³ Jesu ali, “Mu—mopolofita ha kutekwi mwa naha ya habo.” Mi, kakuli, kwani kona ko hulezi, ni ko ba kuziba batu. Mi kwani Na bile ni—ni—ni libizo le li maswe, ka kukala, Yena ka kupepwa asina ndate wa mwa lifasi. Ne ba Mu biza kuli “mwana wa mwa bunyazi,” kuli Maria na itwezi mane a si ka nyalwa kale, ka swanelo, ku Josefa. Kono, sani ha si cwalo, lu ziba kuli ha ku cwalo.

²⁴ Mi fa Liñolo le, se si ezize kuli meeto aka atalime ku se, neli sika se ne si ezahalile cwanoñu nyana mwa Phoenix, Arizona. Neli zazi la mafelelezo, ka za sebelezo yene Ni bata ku bulela kwa Mukopano wa Linaha za kwande kwa Baana ba Pisinisi ya Evangeli Yetezi.

²⁵ Mi mwa mukopano wo ne kuna ni muenyi yana li ni luna, ya nali bishopu wa Katolika, ili wa—wa “litukelo za Makalade wa keleke ya Katolika yaba Apositola; yena Rev. Yazibahala John S. Stanley, O.S.D.” Yani ki “yena bishopu yomuhulu wa ba muleneñi wa ba United States,” mwa keleke ya Katolika. Ye neli kadi ya hae ni—ni keyala ya hae.

²⁶ Mi nali muenyi ni Baana ba Pisinisi ya Sikreste, mi ne Ni mu boni kwani, zazi la maloba. Mi cwale ha ne Ni ambola la Pelekelo busihu, Na sepa neli cwalo, kamba la Pelekelo kakusasana kwa mukushuko, mi Na . . . Sina hane Ni bulela, na sweli ku ni talimela. Na hupula kuli, “Muuna yani kaniti usweli ku sa lumelelana ni lika kaufela ze Ni bulela.” Mi, mwa ziba, mwa kona ku—ku mu bona fela; na sweli ku nyunga toho ya hae mwa halimu ni mwatasi, kono Ne ni sa zibi ze ne sweli fela ku beleka ku yena.

²⁷ Kacwalo la Sunda musihali, hane Ni nanuhile kuli ni kutaze, Ne ni ka nga palo yaka ka za *Butuku bwa Kupepa*, fa fana bulezi Jesu, kuli, “Sina musali hali mwa butuku bwa kupepa mwana,” wa utwa butuku ha pepa. Mi kacwalo ne Ni ka bulela kwantu, ka za, *Butuku Bwa Kupepa*, kuba taba, kubulela kuli lifasi liinzi mwa butuku bwa kupepa cwale. Za kale li lukela ku feliswa, kuli zenca li pepwe; kuswana fela inge—inge peu ha ilukela kubola, ili kuli itise bupilo bobunca.

²⁸ Ni ka mo butuku, butuku bwa kupepa bu natile lifasi! Mwa Ndwa ya Pili ya Lifasi, ne lina ni butuku bobutuna maswe, kakuli ne ba nani moyo o buhali, ni zeñwi cwalo, zani ne li ka yundisa lifasi. Mi mwa Ndwa ya Bubeli ya Lifasi, la natwa hape, ka butuku bobuñwi bo butuna; neba nani zwelopili yetuna hahulu, mi hape ni bomba ya atomic. Ha li sa kona ku yemela butuku bobuñwi hape. Ka lilemano ze buhali ze ni lika za kacenu, ndwa iliñwi fela ika li nepela mwa mbyumbyulu, kakuli li ka lamulelwia cwale. Mi ku kaba lifasi le linca. Bibebe ibulezi kuli lika ba teni.

²⁹ Mwatasa Liñusa la mopolofita kaufela, Isilaele nabile butuku bwa kupepa, bakeñisa kuli bapolofita ba neba tahanga

kasamulaho baituti ni baluti ba za bulapeli ha se ba beile keleke mwa buino bwa kopano ya kuonga-ongá. Mi cwale bapolofita bani hane ba tahanga ni za kuli KISONA SA BULELA MULENA, ne ba nyunga likeleke zani, mi ne liba ni butuku bwa kupepa. Mafelelezo, la ba ni butuku bwa kupepa kutaha cwalo kufitela ha li to pepa Mwana mushimani wa Evangelí, yanali Linzwi lona Kasibili mwa nama.

³⁰ Kacwalo keleke kaniti i inzi mwa butuku bwa kupepa busihu bwa kacenu, hape, kuli ipepe Mwana mushimani, Mwana Mulimu kuli atahé hape. Baituti ba luna ba za bulapeli, milao ya luna kaufela, likopano za likeleke za luna kaufela, li bolile kuzwelela mwatasi ku luna. Kacwalo lu mwa butuku bwa kupepa, mi Liñusa lelizwa ku Mulimu kamita li nepelanga keleke mwa butuku bwa kupepa bo bu bukiti, kono kasamulaho nyana li ka pepa Munyaliwa. Ya ka tisa Jesu Kreste ku Munyaliwa wa Hae.

³¹ Mi, cwale, ne ni nahana kuli muuna yo naalelwá ku lumelelana ni na hahulu. Hane Ni yemi ku bulela Liñusa le, Na apula mwa Bibele ya ka, ku fumana likepe.

³² Mi musalaka kona ha na sa zo ni fa Bibele yenca, ya Kilisimasi. Bibele yaka ya kale ibata kueza lilimo ze fiftini, mi yona ne ibata fela ku ikaba mwa liembaembá. Makepe, nako kaufela hane ikwaluwanga, na kumauha mwateni. Mi, kono Ne ni ziba hande fela kwa ku fumana Liñolo kaufela, kacwalo Na bala ka tokomelo mwa Bibele yani. Mi se Ni nga fela yenca, kakuli yeñwi ne ibonahala fela kufela ni kuyonga, kuli ni ye kwa keleke ni yona.

³³ Mi hane Ni kalile ku apula ku Muñoli Joani, kone ku fumaneha Liñolo, Na kala kubala mwa kauhanyo ya 16, mi timana ye ne Ni bata neisiyo mwateni. Kacwalo Na hupula kuli, “Ki ze nca!” Na kutela fateni hape; niteni ne i siyo mwani.

³⁴ Mi Muzwale Jack Moore, kuzwa kwa Shreveport, Louisiana, mulikana ka wa fa sifuba, na liteni kwani. Se nili, “Muzwale Jack, kana yani ha ifumanwi ku Muñoli Joani 16?”

Abulela kuli, “Eeni.”

³⁵ Mi muprisita wa Katolika yo ato yema mwa sipula ha hae, mwendi mwahala baituti ba za bulapeli baba mwanda ku bene bali kwa katala; ataha bukaufi ni na, ni liapalo za hae ni mikano ni lifapahano, ni zeñwi cwalo, mi ataha a sutelela hahulu kuna. Mi ali, “Mwana ka, u tokomele. Mulimu ubata ku zamaya.”

Na hupula, “Bishopu wa Katolika ani bulelele cwalo?”

Ki hali, “Ibale kuzwa mwa Buka yaka.”

³⁶ Mi Na bala Liñolo mwa Buka, mi na nga taba yaka ni kuzwelapili, na kutaza kutazo yaka.

³⁷ Kasamulaho, hane Ni felize, ayema ha ne se Ni ile, mi ali, “Kuna ni nto iliñwi ye lukela ku ezahala. Kasamulaho wa sani,

keleke i lukela kuzwa mwa busafa bo ikeni ku bona, kamba lu lukela kuzwa mwa masila ao keleke ikeni ku ona.” Kacwalo, yeñwi kamba yetatama.

³⁸ Mi Ne nili mwa musipili wa ka kuya kwa hae, kukutela kwa Tucson, manzibwana ani. Banana ne ba lilela banzi ya liñende, mi Na yema kuli ni be ni liñende fa kantemba nyana. Mi musalaka ali, “Bill, Ne ni si ka ba kale ya ikalelwa mwa bupilo bwaka kaufela, kubona inge uyemi fani unzo sweli kukaña-kaña mwa Bibele.” Ali, “Kana ne li sa ku ikalelwa?”

³⁹ Se nili, “Batili.” Se nili, “Ne ni ziba kuli neiliteni mwani kokuñwi. Ne ba sina fela likepe mwani. Neli mafosisa a kuñola.”

⁴⁰ Mi ki hali, “Kwa ku nahana, kuli Ni ku lekezi Bibele yeo! Ne ku bonahala kuli liito kaufela ne li ni talimezi.”

⁴¹ Mi se Nili, “Kihande, no si ke wa ipata ku sani. Ani neli mafosisa a kuñola mwa Bibele.” Se nili, “Ne ba si ka beya fela likepe lani mwateni.”

⁴² Kihande, Na talimafafasi ni ku i bata sinc a hape, ka kupetahala fela mo ku lukela kubela; kono kauhanyo ya 16 ifeleta, siemba, siemba sa yona neli fela mainci amalalu kuzwa kwatasi, mwani mwa kauhanyo ya 17 kwa neku leliñwi, ieza taba yeswana. Mi, kakuba Bibele yenca, makepe amabeli ani naswalani hamoho, mi Ne ni sweli kubala mwa kauhanyo ya 17 isiñi ku ya 16. “Kihande,” Se nili, “sani kaufela si lukile. Ki ka libaka.”

⁴³ Mi inge fela mo mu kona ku utwela linzwi la ka cwana, Linzwi la taha ku na, mi lali, “Na ile kwa Nazareta, kwa Na hulezi; mi akena mwa sinagoge, sina hanoli mukwa wa Hae. Mi muprisita a Mu tambeka Linolo kuli abale, mi A bala Isaya 61. Mi ha Na balile Mañolo, A ina fafasi; a kutiseza muprisita Bibele, yona Buka, mi aina fafasi. Mi meeto kaufela a kopano nali ku Yena. Mi Manzwi amande a zwa mwa mulomo wa Hae. Mi ki Hali, ‘Zazi le Liñolo le li talelelizwe.’”

“Zazi le Liñolo le li talelelizwe.”

⁴⁴ Ki kunonga ko ku cwani kwa Mañolo! Haiba mu lemuha se mwa Isaya 61:1 kuya fa 2, kona fa na sweli kubala Mulena a luna mwa, Isaya 61:1 kuya fa 2. Kono mwahala timana ya 2 ya Isaya 61, A yema. Fo ne kubulela kuli, “Moya wa Mulena u fa halimwa Ka; kuli ni kutaze mwaha wa sishemo,” mi A tuhela. Kiñi? Siemba sesiñwi, sa kutisa katulo, ne si sa zamaeleli ni kutaha kwa Hae kwa pili, kono ki Kutaha kwa Hae kwa bubeli. Mwabona, ne si sa zamaeleli ka nako yani. Ki niti kuli mane Mañolo a fosi! Ona kamita a petehile. Jesu na tuhelezi fo ne ku yemezi Mañolo, kakuli sani neli sona luli sene si pakilwe mwa lizazi la Hae, cwale, mwa kutaha kwani kwa pili. Kutaha kwa bubeli Uka tisa katulo mwa lifasi; kono isiñi ka nako yani. Na lukela “ku kutaza mwaha wa sishemo.”

⁴⁵ Mulemuhe Mesia ali kuyema fa katala, inza itibahaza Iliyena ka Linzwi la sepiso ya lusika lwani. Ki nto yenca cwani, Mesia ali kuyema fapila keleke! Mi a mutualime fa Manzwi amande a, fani ha Na bulela fa, “Ku to kutaza mwaha wa sishemo.”

⁴⁶ “Mwaha wa sishemo,” sina kaufela luna ha lu ziba, kakuba babali ba Bibebe, kuli neli “mwaha wa tukuluho.” Kuli, batamiwa kaufela ni mapantiti, ka mo ne ba inezi, ne ba ngilwe, kubewa mwa tolongo; mi ne ba na ni kufa mwana wa mushimani, kuli alife sikoloti; kamba wa musizana, kulifa sikoloti, [Hakuna manzwi fa tepu–Mu.] mi nebali kwani mwa butanga. Hakuna taba ka nako yetelele cwani yene bali mwa butanga, kamba butelete bwa nako yene ba lukela kuina mwateni; mwaha ha no tile, wa tukuluho, tolombita hane ilila, mutu kaufela na kona kuya inza lukuluhile. [Hakuna manzwi fa tepu.] Mu lukuluhile. Ha musana kuba batanga ni hanyinyani.

⁴⁷ Haiba ne mu itakaleza kuba mutanga, konakuli ne mu lukela kuisiwa kwa tempele, kuyema fa musumo wa tempele, mi ne ba nganga sipunyiso ni ku punya musima kwa zebe ya hao, mi kipeto ne mu lukela ku sebeleza mulena wa batanga yani mazazi a bupilo bwa mina kaufela.

⁴⁸ Ki mutala o petehile cwani wa Evangeli ya Jesu Kreste! Ha Li kutazwa, nako ya sishemo, mi nako ya Tukuluho; mutu kaufela, hakuna taba kamba ki wena mañi, mubala wa hao, kopano yeo ufumaneha ku yona, kuya ka mo tibezi mwa sibi, kamba se si fosahalile ni wena; wa kona kuya uli ya lukuluhile ha uutwa tolombita ya Evangeli ha ilila. U lukuluhile!

⁴⁹ Kono haiba usikululela mukokoto wa hao kwa Liñusa ni ku hana ku Li teezeza, mulemuhe, u punyizwe kwa zebe, ni sipunyiso. Sani si talusa, ku li, u silile mululwani wo mwahala muhau ni katulo, ha usana ku utwa Evangeli hape. Ha u sana kuya kwapili hape ni hanyinyani. Ulukela kuba mutanga kwa mulao oli ku ona, mazazi kaufela a bupilo bwa hao, haiba u hana ku amuhela mwaha wa sishemo.

⁵⁰ Cwale, siemba sesiñwi sa teni, sina ha Ni bulezi, ne si sa tokwi ku alabiwa, kakuli Mesia yana taha yo, fa nako ye cwale, kona Ha ka tisa katulo.

⁵¹ Cwale, kana batu bani ne ba palezwi cwani kubona Yo nali Yena? Ne ba latehezwi cwani ki zona? Ne li ka ba cwani, kanti ne li zibahalizwe ku bona ni ku boniswa? Kana ne ba mbwinjize cwani ni kupalelwa kubona? Fani ha Na . . .

⁵² Ha ki Linzwi ni leo! Mu nahane ka zona, “Zazi le Liñolo le li talelelizwe fapila meeto a mina.” Ki mañi yana bulezi sani? Mulimu Yena luli kasibili, Yali yena mutoloki wa Linzwi la Hae Iliyena. “Zazi le Liñolo le li talelelizwe.” Mesia, Iliyena, inza yemi mwahala kopano ni kubala Linzwi kuzwa mwa Bibebe, le li toloka yena Kasibili, mi cwale ali, “Kacenu Liñolo le li talelelizwe,” kono ni cwalo ba palelwa ku Li bona.

⁵³ Ki taba mañi kwa kutomola pilu mo ikona kubela yani, kono i ezahalile. I ezahalile linako zeñata. Ne li ka ezahala cwani? Eni sha, sina mo ne kubezi mwa linako zeñwi, ka ku lumela toloko ya mutu ya Linzwi. Sani kona sene si ezize cwalo. Balumeli bani mwa mazazi ani, mo be ba bizezwa, ne bangile toloko ya seo baprisita ne ba bulezi ka Mañolo. Kabakaleo Jesu, na sa weli ku zeñwi za litulo za bona kamba tutengo twa bona, Na lelekezwi kwande kuzwa mwa katengo ka bona.

⁵⁴ Mi, kabakaleo, ne ba palelwa ku Mu ziba mwahala bona, kakuli Na shutana ni bona. Mutu wa Jesu Kreste nali ya ipitezi hahulu kuli hakuna yana ka palelwa kubona kuli yani neli Mwana Mulimu, kakuli Nali siswaniso se sipetehile luli sa Mañolo sene si ñozwi ka Yena.

⁵⁵ Yani kona nzila ya zibahala ka yona Mukreste kaufela, ki fo bupilo bwa hae ha bu paka lika luli zeo Mukreste alukela kueza.

⁵⁶ Mwa Na yemezi fani ni ku bulela kuli, “Zazi le Liñolo le li talelezizwe fapila meeto amina!” Ki kuipitela koku cwani, ki ku patalala koku cwani, kono niteni batu bani ne ba sa utwisisi. Kiñi? Kakuli bengile toloko yeñwi ya mulao wa baprisita bene ba teezeza ku bona.

⁵⁷ Mi za kale kamita za kutakelanga ili zona. Mi Mañolo ana ni litaluso zepeli ku Ona, ni sinulo mwa likalulo zepeli.

⁵⁸ Ka mutuala, sina ha i bulela mwa Bibele, kuli, “Kuzwa mwa Egepita Ni bizize mwana ke,” ili kupaka Jesu. Mubatisize hande sani, mi mu ka fumana, hape ne li paka Jakobo, Mañolo aswana. Jesu nali Mwana Hae yomutuna. Jakobo nali mwana Hae ya Na bizize kuzwa mwa Egepita, ili yo ba Scofield ni litaba zeñwi kaufela ze swanisisa ku yona, kakuli sani ki sona seo Mañolo na swanisisa ku sona. Kacwalo ne si na ni—ni likalabo zepeli; ne si na ni kalabo ku Jakobo kuba ya bizelizwe kwande, ni ku Jesu yana bizelizwe kwande.

⁵⁹ Mi ona cwalo kona mo kuinezi kacenu! Ki kuli lu inzi mwa ziezi hahulu ka mo lu inezi, mi batu ba palelwa kubona Niti ya Mulimu, kakuli kuna ni litoloko zeñata hahulu za ipangezi mutu za Linzwi la Mulimu. Mulimu ha tokwi mutu kuli a toloke Linzwi la Hae. Yena ki mutoloki Iliyena Kasibili.

⁶⁰ Mulimu na bulezi kuli, kwa simuluhu, “Hakube liseli,” mi kwaba liseli. Sani ha si tokwi toloko kaufela.

⁶¹ Na bulezi kuli, “Mwalyanjo uka itwala,” mi sa itwala. Sani ha si tokwi toloko kaufela.

⁶² Fani...toloko ya Mulimu ya Linzwi la Hae ki fo Ha Li paka kuba ona cwalo. Yani kona toloko ya Hae, ka ku lieza kuli libeten. Kwani kona ku inzi toloko ya Mulimu, kifo Ha eza Linzwi la Hae ku to iponahaza. Wa Li toloka ku mina.

⁶³ Sina kambe kwali kuba cube ni liseli, mi U bulela kuli, "Ha kube liseli," mi kipeto laba teni, sani ha si tokwi kuli mutu a si toloke.

⁶⁴ Kono lu ikungela nga milao ya ipangezi mutu ni ku ikopanya ku Yona, mi, ha mu eza cwalo, mu—mu ka Li zusa mwa sikuka. Ki bile ona cwalo kamita.

⁶⁵ Kono Ni sa nahana ka mo li kona kubela ze ipitezi. Mi munahane ka zona, Mesia! Kiñi hane ba palezwi ku Mu bona? Kakuli, bona baeteleli ba bona sakata bene ba swanelia ku Mu ziba, bene ba lukela ku nopana hande mwa litimana za Mañolo, bene ba lukela kuba ni kutwisiso ya Mañolo, ne ba nyanyifalize Muuna yo ni kubulela kuli, "Ki mwana wa mwa bunyazi, ka—ka kukala. Ne lu si ke ku lumela Sani."

⁶⁶ Myaha kasamulaho, ha lu lumeli zani. Ne lu ka shwela ka libaka la kubulela kuli Nali Mwana yana pepilwe ki mwalyanjo.

⁶⁷ Mi ku ka to ezahala zazi leliñwi kuli, ona lika ze lubona Jehova ha eza kacenu, batu mwa masika asa taha, haiba nji ateni, ba ka shwela lika ze lubulela kacenu. Mu ka ba ni kueza seo fo nombolo ya sibatana ha se itile, mi hamuna ku lumelezwa ku kutaza Evangelii ka nzila ye. Fo kutwano yetuna ya likeleke haika taha hamoho, yeo yeli ka swanelo ona fa mwa keleke ya lifasi, muka ba ni kuswaya bupaki bwa mina ka bupilo bwa mina tota, ku Se.

⁶⁸ Mu swanelia ku lumela Seo ona fa. Kambe baprisita bani ne ba ka zuha, bani bene ba Mu nyaza, ne ba si ke ku Mu nyaza. "Kono," mu li, "kambe Ne ni ka pila kwani, Ne ni ka eza sa *kulin-kuli*." Kihande, lwani ne si lusika lwa mina. Kono, lo ki lusika lwa mina, ye ki yona nako.

Mu li, "Kihande, kambe Na li teni fa!"

⁶⁹ Bibele ibulezi kuli, "Ki ya swana maabani, kacenu, ni kuyakuile," wa swana, kacwalo U teni fa. Kono, Utensi fa. Sina lifasi mo li zwelezi pili, libile le lituna, ni kuituta hahulu; Utensi fa mwa mufuta wa Moya, wo ba sa koni ku bulaya kamba kuomba moyo kuisa lifu. Na shwile hañwi; Ha koni kushwa hape. Na na ni kuezwa nama kuli Mulimu abeiwe ya shwa mwa nama, ka sibi. Kono nako ye Ha na kushwa ni hanyinyani; Ki Moya o Kenile.

⁷⁰ Cwale, mo lukona ku nahanelia kuli ne ba na ni lika zani ka ku Mu lwanisa! Taba yeñwi, kuli Na si ke ku ikopanya ku yeñwi kaufela ya litulo za bona. Mi cwale, mwa bona, sani ne si Mu eza kuba mutu ya maswe. Na si ke ku kopana ni likopano za—za bona, na si ke ku kopana ni buprisita bwa bona, mi Na si ke kuba ni sa kuezwa ni zona. Mi cwale, kwanda zeo kaufela, Na likile ku bulumuna se ne ba yahile.

⁷¹ Na keni mwa tempele ya bona. Lu Mu biza kuli ki Muuna ya ishuwile; Na li cwalo, kono linako zañata lu palelwanga ku utwisisa seo kuishuwa kuli sona.

⁷² Nali Muuna wa makeke, kono ibo lu palelwanga fokuñwi ku utwisisa seo makeke ali sona. Isiñi makeke a butu, ha ki makeke. Kono, *makeke* ki “kueza tato ya Mulimu.”

⁷³ Na fitile mwa lisa la—la Betisaida, fa munyako. Ne ku lobezi batu, mwa buñata bwa bona. Buñata-ñata ha ki nombolo ye zibahala. Kono ne ku nani batu babañata-ñata; lianga, libofu, baba omelezi luñañali, baba fokozi. Mi Na nani makeke fa sicaba, kamita. Mi A ya ku mutu alimuñwi yana li sianga, sibofu, wa luñañali, kamba ku fokola; mwendi nanna ni butata bwa sinya, mwendi nana ni butuku bobuñwi bone bu cinezi. Na bu kulile fa myaha ye mashumi amalalu ka ye eiti. Ne li sa mu katazi, ne li sa mu bulai. Na lobezi fa kaseme. Mi ki Ha li, “Kikuli ulata ku fola nji?”

⁷⁴ Mi muuna yani ali, “Hanina mutu wa ku ni beya mwa mezi, kono ha Ni nze ni taha, kihande, yomuñwi wa ni laka.” Mwabona, na kona ku zamaya, na kona ku bona, na kona ku hata hata kwa ni kwa, kono fela nali ya fokola.

⁷⁵ Mi Jesu ali ku yena, “Zuha. Nanula bulobalo bwa hao mi uikele kwa ndu ya hao.” Mi Jesu na buzizwe ka taba yani, kakuli mwa hupula Mañolo na bulezi seo.

⁷⁶ Ki kabakaleo! Kambe Na ka taha mwa Jeffersonville busihu bo ni kueza kezo ye cwalo, ne ba ka zwelapili ku bulela za Hae.

⁷⁷ Kono, muhupule, Na tilo eza nto iliñwi, neli tato ya Mulimu. Cwale, zeo li fumaneha ku Muñoli Joani 5:19, mu ka fumana kalabo. Na ize, “Ka niti, niti, Ni li ku mina, Mwana hakuna sa kona kuikezeza Iliyena; kono kwanda Sa bona Ndare aeza, ki sona sa ka eza Mwana.”

⁷⁸ Cwale, ne ba lukela kuziba kuli yani neli yona ponahazo luli ya sipolofita sa Mushe, “Kakuli Mulena Mulimu wa mina uka zusa Mupolofita ya swana sina na.”

⁷⁹ Kikuli mu lemuhile, fani ha Na boni muuna yani, A bulela kuli... Jesu na zibile kuli na bile mwa buino bo ka myaha yemiñata. Mwabona, kakuba Mupolofita, Na boni muuna yani mwa buino bwani; mi aya kwani ni ku yo bonisa—bonisa nzila ya Hae mwahala batu bani, kubeuka mwa nyangela, konji ha Na yo fumana muuna yani.

⁸⁰ Afitelela lianga, ba luñañali, libofu, ni baba fokozi, kono inzali Mutu yatezi makeke. Kono, *makeke* ki “kueza tato ya Mulimu.”

⁸¹ Cwale, lwa Mu fumana, inge Na sa lati kuikopanya ni bona, Na sina sa kueza ni litulo za bona, mi A ba muyambaeli. Na si ke kuba ni yeñwi ya . . .

⁸² Kwanda sani, Na ile mwa tempele zazi leliñwi. Muuna akena mwani mi afumana ndu ya Mulimu yali ku ntampakana sina mo ibezi kacenu. Ne ba leka, kulekisa, kucinca mali. Mi A fetaula litafule za masheleñi; anga mihala mi a iota, mi anata bene ba cinca masheleñi kukzwa mwa tempele. Mi aba talima ka buhali, mi ali, “Ku ñozwi,” haleluya, “Ndu ya Ndate ki ndu ya tapelo; kono mina muifetuzi makundano a masholi. Mi mina, ka lizo za mina, mu ezize litaelo za Mulimu kuba ze sina tuso.”

⁸³ Oh, kana sikwata se si cwalo ne si ka Mu lumela nji? Batili, sha. Ne ba tapwita mwa sileze sa tutengo ni masila a lizazi la bona, kufitela ha ba tiloba hahulu mwa bulapeli mane ba kangela kufitela ba palelwa ku utwa kunjanja kwa Mata a Mulimu Muambakani. Ki kabakaleo musali yani na konile ku swala mungundo wa sapalo sa Hae ni ku foliswa ka Ona; mi musole ya kozwi na mu kwezi mati kwa sifateho sa Hae mane atokwa kuutwa nihaiba mata a likani! Ku itingile ka mo talimaneli ni Ona. Ku itingile ku so bata. Ha u ya kwa keleke, ku itingile ku so bata.

⁸⁴ Cwale lwa Mu bona ali kuyema fani. Hakuna ku kakanya kono ki zona zene ba mu lemusize kale, ku lemusi... baprisita ne ba lemusize kale batu, “Cwale Uka taha kwanu la Sabata yetatama, mi, ha Sa tile, mu si ke mwa Mu utwa. Cwale, mwa kona kuya ku yo ina kwani, kono mu si ke mwa iseza ngana ku Sa bulela, kakuli Ha ki wa sikwata sa luna. Ki muyambaeli. Hana kadi ya kopano. Yena mane hana nihaiba kateng-... pampili ya katengo. Hana sika se si cwalo.”

“Ki sikamañi Sali sona?”

⁸⁵ “Ki mushimani yomuñwi wa mubeti yana pepezwi kwanu, ali mwana wa mwa bucwani, mwa lapa la mubeti, mahe na itwezi Yena ba si ka nyalana kale, mi balika ku tiba-tiba taba yani kuli ki nto ye ipitezi ya moyo.

⁸⁶ “Lwa ziba cwalo, kuli Mesia ha ka taha, Uka taha inza shetumuka mwa makozwana a nzila ya Lihalimu ni kuya ku muprisita wa luna yomutuna ni kubulela kuli, ‘Ki Na yo fa, Kefasi.’” Kono lu fumana kuli Na si ka eza ka nzila yani, kakuli ne li si ka ñolwa mwa Linzwi ka nzila yani. Neli sizo sa ipangezi mutu sene si ba tiselize kueza cwalo.

⁸⁷ Linzwi ne li bulezi kuli U ka taha ka nzila ya Na tile ka yona. Mi ki yani Ayema fani, kubala Linzwi, mi ali ku bona, “Zazi le Liñolo le li talelelizwe mwa meeto amina.” Mi niteni ba palelwa ku Mu bona kamba ku Mu lemuha, sina mo ne ba ezelize mwa masika kaufela.

⁸⁸ Nuwe na bulezi ze swana, zazi la na keni mwa areka ni sikwalo sa kwaliwa. Mushe na ka kwalula lihaulo fahalimu a areka, ni kutalima fa kopano... Muhupule, Mulimu ki yena yana kwalile munyako. Mi na ka bulela kuli, “Zazi le Liñolo le li talelelizwe mwa meeto a mina,” kono ne se ba liyehile kale

ka nako yani. Na sa kutalize myaha ye mwanda ni mashumi amabeli, ka kulika ku ba kenya mwa mukolo one ba betile wani, ku ba bulelela kuli Mañolo na bulezi kuli, "KISONA SA BULELA MULENA, i ka nela," kono ne ba libelezi nako yetelete hahulu. Kono Nuwe na ka bulela ka bunolo kuli, "Kacenu, zazi le, Liñolo li talelezizwe."

⁸⁹ Mushe, lona lizazi leliswana leo Siita sa Mulilo hane si tulukile fa Lilundu la Sinai ni ku yemela bupaki bwa hae, Mushe na ka bulela kuli, "Zazi le Liñolo li talelezizwe."

⁹⁰ Mushe, mwa ziba, nali muuna ya bizizwe ki Mulimu, kuba mupolofita. Mi cwale ha na sweli ku biziwa, kakuba mupolofita, nana ni kuba ni kutwisiso ye ipitezi. Fa kuba mupolofita, nana ni ku kopana ni Mulimu pata ni pata ni kuambola ni Yena. Mi taba yeñwi, sa na bulezi ne si tilo ezahala, kusi cwalo hakuna nihaiba alimuñwi ya na ka mu lumela.

⁹¹ Konakuli hakuna mutu yana ni tukelo ya kuipiza yena muñi cwalo kufitela abulela pata ni pata ni Mulimu, kwa mulaho wa lihalaupa kokuñwi, kwa na kopani ni Mulimu, yena kasibili. Mi ni baba sa lumeli kaufela mwa lifasi ne ba sa koni ku mu lyanganisa mwa litaba; na liteni fani, na zibile kuli ne li ezahalile. Mukreste kaufela uswanelu kuba ni zibo yeo a si ka bulela kale sika kaufela sa kuba Mukreste. Zibo ya hao kasibili!

⁹² Ne ni ambola ni mwana kezela ka wa mucaha, nako nyana ye fitile, mushimani nyana wa Katolika, yana bulezi kuli, "Malume bo Bill, Ni zamaile kuzwa sibaka se ni sibaka sani, kuya kai ni kai, kulika ku fumana sika." Busihu ni busihu, mukopano wo usika kala kale, ubile alila. Mi ka nako ya busihu, ubile aba ni litolo za kutaha ku to kena, kumatela kwa kataala, kwa na ti lo kutaza, ni kufa buipuleli kuli u fosize.

⁹³ Se nili, "Melvin, hakuna taba ko u lika kuya, ki likeleke zekai zo ka kopana ku zona, kamba buñata bwa bo 'Lumela Maria,' bo ka bulela, kamba ki limbuyoti zekai zo ka amuhela ku mutu, ulukela ku pepwa sinca ka Moya wa Mulimu. Kona taba fela ye ka kulisa pilu ya mutu."

⁹⁴ Sani, Ni ziba kuli bana ni sa kuyolisa, kacenu, ka kupepwa sinca, ku itumelisa fela mwa mazoho ni mukutazi ni kubeisa libizo la mina mwa buka. Kono, balikani, yani ki tuto ya litumelo. Ha ki Niti ya Bibebe. Kambe ne ikaba cwalo, Likezo za Baapositolta, mwa kauhanyo ya 2, ne i ka bala cwana, "Mi Lizazi la Pentekota ha ne litile, bo mulisana be zwela fande ni ku swalana mwa mazoho."

⁹⁵ Kono ili, "Mi Lizazi la Pentekota hane litile ka kutala," ka nako ya ku kakula Keleke, "kwa taha mulumo o zwa kwa Lihalimu inge moyo omutuna wa liñungwa, mi wa tala ndu kaufela mo ne bainzi." Cwalo kona Moya o Kenile mo notezi ka nako yapili. Kona Mo utahezi ka nako kaufela ku kala

ona nako yani. Yena ki Mulimu, mi ha usika cinca. Cwale, Wa sitatalisa batu.

Ba bulela kuli, "Zani neli za lizazi lisili."

⁹⁶ Kihande, Ki ya swana maabani, kacenu, ni kuyakuile. Nako kaufela Keleke fone i amuhelanga Moya o Kenile, Ubile u tahanga kamita cwalo sina Mwakile aezeza ka nako ya pili, mwataswa timana yeswana, ya Likezo 2:38; ha isika cinca, haina ku cinca.

⁹⁷ Sina muñolelo wa dokota ka butuku. Uka ñola taba yeñwi kuama butuku, dokota wa ezanga cwalo. Ni ku i isa ku mulekisi wa milyani yomuñwi wa kuluku, mi ubeya hahulu mulyani omuñata ku ona, ki o fokola hauna ku mi eza hande; haiba ubeya maabela mwateni, uka mi bulaya. U lukela ku ñolwa kuya ka dokota.

⁹⁸ Mi muñolo wa dokota ka za ku amuhela Moya o Kenile u talusizwe ki Dokota Simoni Pitrosi, ka Lizazi la Pentekota. "Ni ka mi fa taluso ya yona. Mubake, mañi ni mañi wa mina, mi mu kolobezwe ka Libizo la Jesu Kreste kwa swalelo ya libi, mi mu ka amuhela mpo ya Moya o Kenile. Kakuli kalafo ki ya bao babali kwahule, ni buñata bwa be Mulena Mulimu wa luna u ka biza." Kalafo ya Kuyakuile!

⁹⁹ Mushe na bile ni kutwisiso ya hae. Nakeni mwa naha mi akala ku bulelela batu, "Ni kopani ni Siita sa Mulilo. Neli mwa sicacani se si tuka mulilo. Mi Ú ni bulelezi kuli ni mi bulelele ni mina, 'KI NA YALI NA. Shetumuka; Ni ka ba ni wena. Nga kota yemwa lizoho la hao mi uibeye fahalimwa Egepita; kaufela so ka kupa, si ka ezahala.'"

Kihande, kaniti muprisita yomuñwi na bulezi kuli, "Ki bukuba!"

¹⁰⁰ Kono hane ba boni niti ya luli ya se, lunge, ya to ezahala, ne ba palezwi ku li swala ni hanyinyani. Ne ba ziba kuli na lumilwe ki Mulimu.

¹⁰¹ Cwale, haiba Mushe na bulezi kuli u cwalo, ni ku paka kuli ki Niti, konakuli Mulimu una ni swanelo, haiba nji yani ki Niti, kwa ku zibahalisa ni ku paka manzwi a mutu ani, kuba Niti. Yani ki niti.

¹⁰² Haiba Jesu Kreste na yemi fani ni kubala kuli, zazi lani, "Zazi le Linzwi le li talelelizwe fapila mina," Mulimu una ni swanelo ya kueza Linzwi lani kuli litalelezwe.

¹⁰³ Lu yemi mo busihu bwa kacenu ni kubulela, kuli, "Jesu Kreste ya swana maabani, kacenu, ni kuyakuile." Mulimu una ni swanelo ya ku paka sani kuba cwalo, kakuli Ki Linzwi la Hae. Cwale, si eza sikamañi? Si lwala tumelo, ka ku Li lumela. Si lwala tumelo, mwa kulumela Linzwi la Hae, kuli Ki yona Niti.

¹⁰⁴ Mulemuhe sene si ezahalile fani Mushe hana lukuluzi bana bani, ni bao kaufela bene ba mu latelezi. Bene ba si ka latelela

ne ba inzi mwa Egepita. Kono bani bene ba latelezi Mushe, fani hane ba zwile mwa Liwate Lelifubelu ni kuzwa mwa lihalaupa, Mulimu na shetumukile fa Lilundu la la Sinai. Ona Siita sa Mulilo sani ne si tumbuzi mulilo fa lilundu, mi Linzwi la bulela kuzwa mwani, mi Mulimu afa milao yelishumi.

¹⁰⁵ Mushe na ka ya fapila sicaba, ni kubulela kuli, "Zazi le Liñolo le Ni mi bulelezi, kakuba mupolofita wa Hae, li tilo ezahala lizazi le. Ni mi bulelezi Mulimu na kopani ni na, mi fahalimu fani mwa sicacani sene situka mulilo, mwa Siita sa Mulilo, mi U bulezi kuli, 'Ni ka... Se ikaba sisupo. Uka kutisa sicaba se mwa sibaka se hape.' Mi ki yani Mulimu fani, mwa Siita se siswana sa Mulilo se ne Ni mi bulelezi kuli Nali ku sona, ne si nyendaela fa lilundu. Zazi le sipolofita se si talelelizwe. Fa Upaka kuli lika ze Ni bulezi kona Niti."

¹⁰⁶ Mulimu a lufe baana babañata sina cwalo, baba sepahala mi ba niti, mi ba bulele Niti, kuli Mulimu Yamata kaufela a pake kuli Linzwi la Hae ki la Niti! Yena u siyala ya swana maabani, ni kuyakuile. Kiñi ha Na si ka eza sani? Na sepisize ku si eza.

¹⁰⁷ Joshua na ka bulela ze swana, zazi ha kuta kwa Kadeshi-barnea, hane ba zamaile nako yetelele mwa lihalaupa. Ne ba kakanya naaha kakuba mufuta wa naaha yeo Mulimu na bulezi kuli ikaba yona. Kono Mulimu na ba bulelezi kuli neli naaha yende, ne ibuba mabisi ni linosi. Mi Joshua ni Kalebu ki bona bababeli fela bene ba li lumela, kuzwa kuba balishumi bene ba baile. Hane ba kutile, neba na ni bupaki; neba na ni sishañata sa magilepu ana shimbilwe fela ki baana bababeli.

¹⁰⁸ Joshua ni Kalebu neba ka yema fani ni kubulela kuli, "Zazi le Liñolo le li talelelizwe. Ki bo bupaki bwa kuli ki naaha yende." Luli. Kiñi? "Kuna ni bupaki bwa kuli ki naaha yende. Ki kai kone muka fumana lika zecwalo, mwa Egepita? Nekusina libaka ze cwalo. Kono zazi le Liñolo le li talelelizwe."

¹⁰⁹ Na ka bulela taba, yeswana, fani hana polofitile ni kubulela kuli mamota a Jeriko aka wafafasi hane ba ka zamaya kupotoloha ha supile, mazazi a supile, linako zesupile ka zazi. Mi hane ba cauzi kupotoloha lwa mafelelezo, mamota awela fafasi. Joshua na ka yema ni kubulela kuli, "Zazi le, Kapitao Yomutuna wa mpi ya Mulena yana ni bulelezi lisunda zetalu kwa mulaho kuli li ka ezahala cwana, zazi le Liñolo le li talelelizwe." Ne kuna ni mamota, ku lobala fafasi. "Amu tahe, lu yo ihapa. Ki ya luna. Zazi le Liñolo le li talelelizwe."

¹¹⁰ Ki bunde bo bucwani, baana ba Mulimu ba yemezi lika ze lukile!

¹¹¹ Isilaele, fa nuka, hane ba luwile naaha, ba silela mwabuse. Neba ka eza cwani? Ki kweli ya Lungu. Muunda wa taha kakuli litwaa la shengunuka, kwani kwa Judea. Oh, ki muzamaisi cwani wa mpi yana bonahala ka yena Mulimu, kwa kutisa sicaba sa Hae

kwani, mwa kweli ya Lungu, fani Jordani hane i bayuzi kufita mo ne ibelanga sapili. Fokuñwi . . .

¹¹² Na kona ku yemela ona fa, kambe Ni na ni nako, kuli ni mife zwisa nyana. Fokuñwi mwakona kuba kwande kafo ni kansa, kamba mwendi muinzi ni butuku; mu nahana kuli, "Kiñi, na, kakuba Mukreste, ne ni kaba mwa nzila ye? Kiñi hane Ni kaba cwana, haiba Ni Mukreste?" Fokuñwi Mulimu u tuhelanga lika kuba zensu hahulu kuli mupalelwa kubona kwa halimu, kwa matuko, kamba kokuñwi fela, mi kipeto Utaha ku to mi pangela nzila mwa kufita, kuli mubulele kuli, "Zazi le Liñolo le li talelelizwe, la Na sepe size ku eza."

¹¹³ Na tuhelezi bana ba Siheberu kukena mwa liyekuyeku la mulilo o sabisa. Neba ize kuli, "Mulimu wa luna wa kona ku lu lamulela kwa mulilo wa mwa liyekuyeku. Kono, nihakuba cwalo, haluna ku kubamela siswaniso sa hao." Hane ba zwezi fande, munko wa liyekuyeku la mulilo ku bona . . . hakuna munko wa liyekuyeku, nitaluse, ku bona; ne ba ka bulela kuli, "Zazi le Liñolo le li talelelizwe."

¹¹⁴ Fani Daniele hana zwile mwa musima wa litau, na ka bulela lika ze swana.

¹¹⁵ Joani Mukolobezi. Kasamulaho wa myaha ye mianda yemine ya kuluta za bulapeli, ki kabakaleo keleke yani ne ili mwa kulyangana kwani ka nako yani! Fani hana bonahalile mwa lihalaupa, fa Jordani, na ka yema ona fa likamba fani, sina mwana ezelize, ni kubulela kuli, "Zazi le Liñolo le, Isaya 40, li talelelizwe."

¹¹⁶ Mo Ni kona kuyemela fa ni ku mi bulelela sana ni bulelezi muprisita wa kale yani! Naize, "Mwana ke, no si ka feza Liñusa lani."

Se nili, "Kuza fela."

Yena ali, "Utalusa kuli Mapentekota bani ha baboni sani?"

Se nili, "Batili."

¹¹⁷ Yena ali, "Na bona cwalo." Mi muprisita wa Katolika, niyena! Uh-huh. Ki hali, "Kiñi ha u si ka zwelapili?"

Se nili, "Kuza fela."

Yena ali, "Kanya ku Mulimu! Na bona cwalo."

¹¹⁸ Mi ka yona nako yani Moya o Kenile wa wela ku kezela hae, yana inzi mwa mukopano. Mi kalibe ayema, inza bulela ka malimi asa zibahali, mi afa toloko ya taba yateni yeo muprisita ni Na ne lu ambola fateni, fa katala. Keleke kaufela, sibaka kaufela, sa kena mwa siyongili. Si zamaya ka mukopano wa Oral Robert sunda yefelile, kamba sunda yefelile yaale kwa mulaho, mi neli ngambolo ya mwa mukopano. Mane kuli muprisita yani . . . Inza li mwataso Moya o Kenile, na patuluzi kwani ka musali, kezela

hae Na lumela neli yena, ka se ne si ezahala kwani fa katala, ni kupatulula taba yani yene lu pata.

¹¹⁹ Hola ye lupila ku yona, zazi le Liñolo le li talelelizwe. Zazi le Maseli a manzibwana atile, mi lu palelwa ku Abona. Mulemuhe.

¹²⁰ Joani na ize kuli, “Zazi le ki Na ‘linzwi la ya huweleza mwa lihalaupa,’ sina ha bulezi mupolofita Isaya. Mulukise nzila ya Mulena!”

¹²¹ Ne ba si ka li utwisisa. Kuli, “Oh, ki wena Jesu . . . wena u—wena u Kreste,” nitaluse.

¹²² Ki hali, “Haki na Kreste.” Ali, “Ha ni swaneli kutamulula makatulo a Hae. Kono,” naize kuli, “Uyemi mwahala mina, kokuñwi,” kakuli na ziba kuli Na kabateni fani. Na kaba mwa lizazi la hae, kakuli Mulimu na mu bulelezi kuli na ka zibahalisa Mesia.

¹²³ Zazi leliñwi Mutangana wa sanana natile kwanu inza zamaya, mi na boni sina Liseli fahalimwa Hae, kuba sisupo. Mi a huwa ali, “Amubone Ngunyana ya Mulimu! Zazi le Liñolo le li talelelizwe fapila mina.” Kaniti.

¹²⁴ Ka Zazi la Pentekota, mwa na yemezi Pitrosi ni kubulela Mañolo a bona, a Joele 2:38. Fani, kaufela hane basweli kuseha kaufela bona, ona sicaba sani. Ne basakoni ku bulela mwa mushobo wa bona luli. Neba sweli ku yabana mwa lika zeñwi. Bibebe ibulezi kuli, “Malimi aikabile a mulilo.” *Kuikaba* ki “ku kauhana” kwa malimi, isiní kubulela nihaiba sika, ki ku yabana fela. Kumata mata inge sikwata se si kozwi sa batu!

¹²⁵ Kaufela ne ba bulezi kuli, “Kihande, batu ba bakozwi. Mu ba talime, mutualime mo ba ezeza, ka mo basali bani ni baana. Habayo mwa swanelo,” kona mo ne ba bulelezi ba sikwata sa bulapeli ba lizazi lani.

¹²⁶ Pitrosi a yema mwahala bona, ali, “Bana bahesu ni mizwale, mina baba yahile mwa Jerusalema, ni mina baba pila mwa Judea, taba ye izibahale ku mina kuli ba haba si ka kolwa, sina mo mu hupulela, kakuli isali hola ya bulalu mwa musihali. Kono se ki sona sene si bulezwi ki mupolofita Joele, ‘Ku ka ezahala mwa mazazi a maungulo, Ni ka sulula kwa Moya wa Ka fahalimwa nama kaufela.’ Zazi le Liñolo le ne li talelelizwe.” Kaniti.

¹²⁷ Luther nali hande ka nako. Wesley nali hande ka nako. Pentekota neili hande ka nako. Hakuna sene si siyo mwa sikuka.

¹²⁸ Cwale Na mi kupa kuli mulemuhe lusika ni nako ye lupila ku yona cwale, ka Linzwi la sepiso la kacenu. Haiba kwa mulaho mwa masika asili, batu ne ba bulela kuli, “zazi le Liñolo le,” “zazi le Liñolo le,” cwale kucwani ka Liñolo la lizazi le? Ki sikamañi se si sepiselizwe lizazi le? Kikai fo lu yemi? Ki hola mañi ye lupila ku yona; fo waci ha i cibilika, waci ya sayansi, kuli ki mizuzu yemilalu lusika fita kale fahala busihu? Lifasi lina ni maikuto a kuikalelwa. Keleke i mwa mumbeta wa ku sa sephahala. Kwani

hakuna ni yomukana ya ziba fo ba yemi. Ki nako mañi ya zazi le kana? Ki cwani he ka Mañolo a lizazi le? Buino bwa keleke, kamba, buino bwa keleke kacenu!

¹²⁹ Mwa lifasi, litaba za na ha, milao ya luna ya lifasi, ibolile fela ka mo ikona kubela. Na hani wa lipolitiki. Ni Mukreste. Kono, Hanina musebezi wa kuambola za ka lipolitiki, kono Ni bata fela kubulela kuli ba bolile kwa maneku amabeli kaufela.

¹³⁰ Ni botile hañwi, sani neli sa Kreste; Ni na ni kuwina. Diabulosi na si ka ni botela, mi Kreste ani botela; kuitingile ka mo Ni nepela mwateni boti yaka. Ni tabile kuli Ni nepezi ku Yena; mutuhele lifasi li bulele ze libata. Na ni sa lumela kuli Wa swana maabani, kacenu, ni kuyakuile. Uka paka cwalo. Yena kaniti ka eza cwalo. Kaniti.

Ku ekezeha mwa bubulai, mutakafululele wa buitamaeli bwa banana!

¹³¹ Mutualime fa na ha ya luna, nako yeñwi neibanga palisa ya lifasi. Tukuluho ya luna yetuna neipangilwe kwa mulaho kwani mwani—mwani mwa . . . kwa patalaza ya tukuluho. Mi patalazo ya tukuluho ne inyatezwi, mi se luba ni tukuluho. Mi bashemi baluna ba kale, ni lika zene ba ezize; ne lu na ni na ha yetuna.

¹³² Kono fa cwale isweli ya bola, ni ku bulumuka, ni ku njanja, ni fa ka mahala. Ni kulika kutelisa batu, kunga mashaleñi a ku lumeleza kwa libaka za kwhahule, kuleka bulikani ni lila za bona; ba li nepela hape kwa lipata za luna. Ndwa yapili ya lifasi, ndwa ya bubeli ya lifasi, mane isa zwelapili ku ya bulaalu. Kaniti. Lipolitiki libolile, ha li sa sepiwa, kubola kuisa kwatasi. Ona cwalo fela sene ibulezi Mateu 24 kuli kona mo ku ka bela, “Naha ika lwanisa na ha yeñwi, mubuso ulwanise mubuso omuñwi.” Lika ze kaufela li ka ezahala. Halu lemuheni se cwale. Ku lukile.

¹³³ Mulemuhe nto yeñwi, kekezo mwa lipatisiso za sayansi. Cwale, nako yeñwi, fe ki . . . Bo kuku ba baana neba yo bonanga bo kuku ba basali, mwa sikocikala. Cwale fa seli fulai yebizwa jeti, kamba mane neba sikuenda sa kukena mwa moyo, mwa mbyumbiyulu ya kwande. Butuna bwateni . . . Kamo, ki mañi yana bulezi se? Daniele 12:4, naize, “Zibo ika ekezeha mwa mazazi a maungulo.” Lu bona hola ye lupila ku yona. Mulemuhe cwale za—za buino bwa lifasi, buino bwa sayansi.

¹³⁴ Mi mulemuhe hape, kacenu, mwa mulao wa luna wa tuto. Cwale musike mwa lika ku latula se. Ni na ni tuemba twa pampili ya mutende, ze luta litaba za boozwa mwa likek- . . . mwa likolo zaluna, kuli bana babanyinyani ba sikolo babe ni silikani sa boozwa ni yomuñwi, kubona haiba nji bakona kupepana mwa lifasi. Eeni, sha.

¹³⁵ Ku cwani he mwa buprisita bwa luna? Busihu bo Ni na ni kaemba ka pampili. Mwani mwa Los Angeles, California, koo sikuwata sa baana ba za bulapeli, ba Baptist ni ba Presbyterian, bakutazi, neba tisize sikuwata sa baana baba nyala baana

babañwi mi baeza kalombe, bali ne balika kuba kutiseza ku Mulimu. Kanti, yani ki yeñwi ya likuto za hola ye, ki Busodoma! Mi mane mulao ubatamile.

¹³⁶ Cwale ki kai fo lu inzi? Mulao wa luna kaufela ubolile ku kalela kwatasi ku luna. Ni boni kekezo ya muuna ni muuna kunyalana m wahala United States kuli iekezehile ka lipesenti ze mashumi amabeli kamba amalalu silimo se si felile. Munahane ka zona, muuna kupila ni muuna, ona cwalo fela sina mo ne ba ezelize mwa Sodoma.

¹³⁷ Kekezo mwa lipulao, mutakafululele wa buitamaeli bwa banana! Ki hola mañi yelupila ku yona? Zazi le Linzwi le la bupolofita li talelelizwe.

¹³⁸ Lifasi la bulapeli, keleke yona kasibili, keleke, keleke ya baba bichelizwe kwande, yeo lubiza kuli keleke ye bichelizwe kwande, lusika lwa mafelelezo lwa keleke, lusika lwa keleke yaba Pentekota, ikai kana? I mwa Laodesia, sina Mañolo a bulezi.

¹³⁹ Kacenu batuhezi likwalo kuikwela fela. Ba hame ba bona bainzi mapunu licika. Baana ba bona ki... Ki nto ye sabissa. Babañwi ba kubona banyezi halalu kamba hane, fa budikoni, ni lika zeñwi kaufela. Ba itobohile, mi bakenyize mwateni kubola, kakuli bainzi mwa tutengo ni kunga sibaka hamoho ni lifasi.

¹⁴⁰ Mi, kacenu, bana ni miyaho yeminde, ye ba kile baba ni yona. Libaka zeñwi, alimuñwi wa bona uyaha muyaho wofeza mali akuma fa madollar a fifite milioni, fifite milioni dollar. Mapentekota! Ne ibanga mwa lilulu, myaha ye twenti faifi kwa mulaho, kuliza kambuli. Bali, “Luna...”

¹⁴¹ Kakuli, Mañolo aize, mwa Sinulo 3, kuli wena u “Fumile,” uli, ‘Ni fumile. Ni ina sina mulena wa musali. Hakuna se ni tokwa.’ Mi hauzibi kuli u mwelwa, u nyandile, u mubotana, u mapunu, u sibofu, kanti mane hauzibi!”

¹⁴² Zazi le Liñolo le li talelelizwe mwa meeto a mina. Amen! Amen italusa kuli “kube cwalo.” Ha ni ikezi amen na muñi, kono Ni talusa kuli Ni lumela kuli Ki Niti. Zazi le Liñolo le li talelelizwe.

¹⁴³ Keleke ya Pentekota inzi mwa buino bwa Laodesia. Oh, ba sa tulaka ni kuhuwa, ni kuzwelapili lipina ha li liziwa. Lipina halikuza kuliziwa, kamba lipina za mutu ya hanile mukwa womunde wa bupilo zeo babañwi balizanga ni kulibiza kuli ki Bukreste, ni zani li sa kuza fela, kanya kaufela yafela. Eehe.

¹⁴⁴ Haiba nji ki milumbeko yaniti ya Mulimu, hakuna kulizaka hahulu miloli ni mata—mata mwa lifasi kuli a li kuzise. Haiba nji kaniti lizwa ku Mulimu, ha si tokwi kunga lipina kuliziwa. Si lwala Moya wa Mulimu kuli utahefafasi ku zona. Sani kona se sieza lika.

¹⁴⁵ Mi ba libezi kale Zani, kakuli ba beile kale Moya o Kenile mwa sitopa sa ona, “bupaki bwapili bwa kubulela mwa malimi.” Mi Ni utwile madimona ni baloi haba bulela mwa malimi.

¹⁴⁶ Moya o Kenile ki Linzwi la Mulimu ku mina, le li itibahaza ili Lona ka kuamuhela Linzwi lani. Kwanda sani, haikoni kuba Moya o Kenile. Haiba nji ubulela kuli ki Moya o Kenile, mi ni kulatula Linzwi la Bibele yani, haikoni kuba Moya o Kenile. Bwani kona bupaki bwakuli mwa lumela kamba nee.

¹⁴⁷ Mulemuhe sisupo sesiñwi se situna. Majuda ba inzi mwa mubu wa bona; naха ya bona, masheleñi abona luli, ki membala wa ba United Nations. Bana ni masole ba bona. Bana ni lika kaufela. Ba inzi mwa naха ya bona; yeo, Jesu na bulezi kuli, “Muitute nguli kwa kota ya feiga.” Ki bani fani, bakutezi hande mwa naха ya bona. Zazi le Liñolo le li talelelizwe, Majuda ba mwa naха ya bona.

¹⁴⁸ Zazi le Liñolo le li talelelizwe, Lusika lwa Keleke ya Laodesia.

¹⁴⁹ Zazi le Liñolo le, Mateu 24, li talelelizwe. Lifasi li mwa kubola, taba kaufela; linaha lilwanisana ni linaha, lizikinyeho za lifasi mwa libaka zeshutana, mañungwa amatuna ataha ashetumuka, kunyunga linaha, ni zeñwi cwalo, lisinyehelo zetuna kai ni kai. Zazi le Liñolo le li talelelizwe.

¹⁵⁰ Ka mo lu fumanela buino bwa lifasi. Lu bona ko keleke ka swanelo, swanelo... Katengo, kopano, lwa bona fo bainzi. Lwa bona ko kuinzi linaha. Mi lubona kuli zazi le lisepiso ze li talelelizwe.

¹⁵¹ Cwale, kono mwa zazi le kuna ni kutaha, Peu yende ya Silena ya Abrahama. Sani kisona luli se Ikaba sona, ikaba Munyaliwa wa Silena ku Mwana wa sepiso, wa Silena. Sina hane Ni bulezi maabani busihu, haiba kuba peu ya nama, ikaba Peu ya moya. Kuna ni kuba Munyaliwa wa moya ya ka zuha, yakaba Peu ya Silena ya Tumelo ya silena ya Mwana wa Silena wa Abrahama. Ulukela kutaha kutoiponahaza mwa mazazi a maungulo, mi nako ni sibaka ki sepiso ye filwe ku Yena.

¹⁵² Kuya ka Malaki 4, Liñolo, kuna ni kutaha Liñusa le li ka nyunga lipilu za batu kukutela kwa bashemba ba buapositola hape. Ku lukela kutaha alimuñwi aiponahaze, mwa mata a Elia, yaka zuha ku to bonahala; muuna wa lihalupa ya ka shokomoka, mi ukaba ni Liñusa le li ka mata hande kulibana ni Linzwi hape. Yani kona hola ye lupila ku yona.

¹⁵³ Mi, mulemuhe cwale, Na mi kupa ka nako ye, mina sicaba kwanu mwa Jeffersonville. Ka 1933, Liseli la buipiteli lene li wile kwani kwa nuka, zazi lani ha ne Ni kolobeza baba myanda ye ketalizoho mwa Libizo la Jesu Kreste, nenili fela mushimani wa myaha ye mashumi amabeli ya kupepwa. Ki sikamañi se ne Li bulezi, Jeffersonville? Neli sikamañi Sani kwa mukulo wa mukwakwa obizwa Spring Street kwani, fani mutende waba

Courier Journal, Na lumela neli wa ba *Louisville Herald*, wo no lwezi litaba za Yona? Ne izo wela ku ba Ba swalisana ni Bubihi bwa Makande, ku yo punya mwa Canada. Muituti Lee Vayle na ipazuzi mwa mutende, kwani kwa Canada, ka 1933.

¹⁵⁴ Hane Ni sweli ku kolobeza mutu waka wa bu sebentini, mwatasa Paki yo; mi mwa ziba likande kaufela. Mi ha ne Ni yemi fale, kukolobeza mutu wa bu sebentini, Liseli la taha kuzwa kwa Lihalimu, la benyafafasi mwa halimu cwalo, inge Naleli ye wa kuzwa mwa Lihalimu. Linzwi la bulela kuli, “Sina Joani Mukolobezi hana lumilwe kuli a itahanele kutaha kwapili kwa Kreste, Liñusa la hao lika etelela Kutaha kwa Hae kwa bubeli, kuya mwa lifasi kaufela.” Zazi le Liñolo le li talelelizwe.

¹⁵⁵ [Puteho ya nyakalala—Mu.] Zazi le! [Puteho ya nyakalala hahulu ni kufita ni kulumba Mulimu.] Mulimu na sepisize. Ki sikamañi se si ezahalile? Zazi le Li hasani mwa lifasi kamukana.

¹⁵⁶ Mi cwale Mulimu hanatilefafasi ni ku to bulela cwalo, hane Ni sali mushimani yomunyinyani, mwa sicacani se situka mulilo, kamba sicacani fahalimu fani, ka mulilo wa Siita sa Mulilo, kwa halimu kwanu kwa sibaka sa Wathen kwa Utica Pike; ne ni ka mezi kwamulaho kwani, kuzwa kwa sishtete sani kuisa kwa sibaka se si kuzize sani, mwa ziba niti ya zona. Na bulezi kuli, “Usike wa be uzuba, kamba kunwa, kamba kusilafaza mubili wa hao, kakuli kuna ni musebezi o lukela kueza haso hulile.” Ni paka kuli yeo ki Niti, kuli Ne ni Si boni. Mi Mulimu, sina mwa Na ezelize ni Mushe, abulela fapila kopano kwatasi kwani, mi ali, “Ye ki Niti.”

Zazi le Liñolo le li talelelizwe mwahala luna.

¹⁵⁷ Mutualime sa Na bulezi kuama temuho, ni mo ikabela; kuzwa kwa kubeya mazoho fahalimwa bona, kuya kwa kuziba likunutu za lipilu. Zazi le Liñolo le li talelelizwe fapila meeto kaufela.

¹⁵⁸ Lisepiso zene sepisizwe ze, mulemuhe, lisepiso ze kaufela ne li pakilwe ni ku talelezwa ka Mulimu wa sepiso. Mutualime, ku nyendaela mwa Washington, DC, busihu bo, ki siswaniso sa Lingeloi la Mulena!

¹⁵⁹ Sina George J. Lacy, yomuhulu wa ba FBI baba talima za kunyatela kwa minwana mwa muuso wa ba United States, na Si tatubile kwani kwa Houston, Texas, mi ali, “Se kona fela Sibupiwa se si ipitezi sinosii se si kile sa swanisiwa mwa lifasi kaufela.” Na lukela kuziba; ki yena yomunde hahulu kuba mwa lifasi, ka zona.

¹⁶⁰ Mulemuhe, ki Sani sinyendaela mwani, kuba Niti, ona Siita sesiswana sa Mulilo sene si etelezi bana ba Isilaele kwa mulaho kwani mwa lihalupa. Sa etelela kacenu, ona mufuta oswana wa Liñusa, la kuli, “Amutahe muzwe mwa Egepita!” . . . ? . . . Zazi le Liñolo le li talelelizwe. Mwa ziba Liñusa la Na bulezi.

¹⁶¹ Mutualime fa pono ya mwa Tucson, lilimo zetaalu zefitile, hane ni yemi mwa nzila mo. Fani, lilimo zeketalizoho kusikaba sani, Na ize, "Zazi leo muleneñi ha u ka kasheza kota kwa pata a munyako wani, mu sikuluhela kwa neku la Wiko." Balikani baka ba mwa tabernakele ba bainzi mo, baziba kuli bupolof bwani...ka—ka nako yani. Kuli ki niti.

¹⁶² Mi zazi leo Bo Goynes ni babañwi hane bali kwahalimu kwani, ni kukasha ona musumo wani fafasi, se Nili ku musala ka, "Kuna ni sesiñwi ka taba ye."

Mi ali, "Ki sikamañi?"

Mi Na kena ku yo talima kabuka kaka kakanyinyani. Ki yani fani.

¹⁶³ Mi lelitatama lani kausasana, ka teni kiloko, ne ni inzi mwahali mwani, mwa sibaka saka mwani, ka teni kiloko, Lingeloi la Mulena la taha. Mi lali, "Zamaya kwa Tucson. Ukaba kwa neku la upa wa kwa mutulo wa Tucson, mi kuka taha Mangeloi a supa mwa sikwenda aka nyunga mubu kaufela bukaufi ni wena." Mi ali, "Uka bulelwa ona kwani."

¹⁶⁴ Ki babakai babahupula sani, kwanu, kale mane lisika ezahala kale? [Puteho ili, "Amen."—Mu.] Kuna ni baana babainzi ona mwa tuyaho wo busihu bo, bene ba yemi kwani hane li ezahalile.

¹⁶⁵ Mi ali, "Maswayo a Supa a likunutu ze patilwe za Bibele kaufela aka kwalulwa, ni kutaleleza Sinulo 10, kuli mwa Liñusa la Lingeloi la bu supa lika ze li lukela kutalelezwa." Zazi le Liñolo le li talelelizwe fapila meeto a luna. Zazi le Liñolo le li talelelizwe.

¹⁶⁶ Ñohola, ne ni yemi mwa sibaka sesiswana, Bo Wood kwanu ni Na, ne lu pahama lilundi, mwa mufuta wa kulila cwalo, ka musala hae ya na kula. Moya o Kenile wa li, "Nopa licwe lei inzi fo leo. Li nepele mwa halimu. Ha li ka wa fafasi, ubulele kuli, 'KISONA SA BULELA MULENA, kukaba katulo ye ka nata lifasi.' Umu bulelele kuli uka bona lizoho la Mulimu, mwa lihola nyana zetatama."

¹⁶⁷ Na bulelela Bo Wood; bateni mo busihu bo. Mi, Na sepa, ki baana ba eiti kamba lishumi, kamba lishumi ni baketalizoho, bene baliteni kwani ka nako yani hane li ezahalile; kakusasana le litatama, fani Mulena hana tile mwa kakundukundu ni ku to sehulula lilundi bukaufi ni luna, ni ku pumaka likota fa halimu linze li nyendaela, ni ku to panca halalu, ni kubulela kuli, "Katulo ilibile kwa Likamba la Wiko."

¹⁶⁸ Mazazi amabeli kasamulaho wa sani, Alaska ne ibata kutiba mwataso lifasi. Mi kuzwa ona fani, kwa ñambamo ni kwa njetumuko ya Likamba, kutokola kwa katulo ya Mulimu kuama ponahazo ya moya yani. Kuna ni lisila la sipi, kuna ni lisila ka mamenge, mi kuna ni lisila la sibi.

¹⁶⁹ Zwelopili izamaile ni lizazi; kona mo izamaezi ni Evangelii. Bazwile kwa upa kuya kwa wiko, inge lizazi mo li zamaelanga. Mi cwale seli Li kwa Likamba la Wiko. Halikoni kuya kuzwelapili hape; haiba nji Li ka zwelapili, Li ka kutela kwa upa hape.

¹⁷⁰ Mupolofita na bulezi kuli, “Kuka taha zazi le li sike kubizwu busihu kamba musihali,” zazi la mbundu, pula yeñata ni mbundu, kuziba fela mwa ku kopanyeza keleke kamba kubeya libizo la hao mwa buka. “Kono kukaba Liseli mwa nako ya swalala ya manzibwana.” Zazi le Liñolo le li talelelizwe.

¹⁷¹ Lona—lona l-i-z-a-z-i leliswana le li pazulelanga kwa upa ki lona l-i-z-a-z-i leliswana le li likelelanga kwa wiko. Mi ni yena M-w-a-n-a Mulimu ya swana yana tezi kwa upa ni ku ipaka Iliyena kuba Mulimu ya bonahalezi mwa nama, ki yena M-w-a-n-a Mulimu ya swana kwa lihalimu la neku la wiko kwanu, ya sweli kuitibahaza Iliyena mwahala keleke busihu bwa kacenu, ali yaswana maabani, kacenu, ni kuyakuile. Liseli la manzibwana la Mwana litile. Zazi le Liñolo le li talelelizwe fapila luna.

¹⁷² Kana lu kai mwa lusika lo lwa Abrahama? Kana lukai mwa nako tuna ye luyemi ku yona ye, ona hola tuna yelupila ku yona? Lipono kaufela li talelelizwe.

¹⁷³ Ku cwani ka mulikana luna wa mukutazi kwani, wa keleke nyana ye lu tusana ni yona, Junior Jackson, ha kile ataha inza lu matela busihu bobuñwi, ku ni matela kwani. Ali, “Nibile ni—ni tolo, Muzwale Branham, ye ni kataza. Ne ni boni mizwale kaufela inge ba kopanezi fa lilundu.” Mi ali, “Fahalimwa lilundu le, no sweli ku lu luta mwa mañolo a na ñozwi, mone ku bonahalela, mwa mañolo amañwi nako yani ana cakuzwi mwa licwe. Ha no felize sani, kaufela zani ne li felizwe, no lu bulelezi, kuli, ‘Amutahe fa kaufi,’ mi luna kaufela ki ha lukopana.”

¹⁷⁴ Ali, “No ilo fita kusili mi, ne kubonahala inge, no sweli sipi ye sikami kwa mafelelezo ni ku sehulula fahalimu a mundandwe o pahami ni kukwalula. Mi, hane kuezahalile cwalo,” ali, “musebezi wa macwe kusina ze ñozwi ku ona. Mi no lu bulelezi kuli lu ‘talime fahalimu a se.’ Mi mina kaufela... Kaufela luna lwakala kutilima.” Ali, “Na sikulula toho yaka, mi ne Ni lemuha kuli no ya kwa wiko, ka tata mo ne ukonela, kuya kwa malikelelo a lizazi.” Ki babakai baba hupula sani? [Puteho ili, “Amen.”—Mu.]

¹⁷⁵ Mi Ne ni yemi fani nako nyana kufitela Moya o Kenile ha u to li patulula. Se nili, “Bibele kaufela, kuya ka mo ipatululezwu ku mutu, ka kuluka, kukeniswa, ni kolobezo ya Moya o Kenile, kolobezo ka Libizo la Jesu, ni lika ze kaufela, li patuluzwi; kono kuna ni likunutu ze patilwe mwahali, kakuli Bibele iswailwe ka Maswayo a Supa. Ni lukela kuya kwani ku yo i fumana.”

¹⁷⁶ Kakusasana wani fani Mangeloi ani a supa ha na tile ni ku to pancisa lifasi, mi macwe afufa kai ni kai, Mangeloi a supa na yemi fani ni kubulela kuli, “Kutela kwa Jeffersonville, ona ko zwelela, kakuli Maswayo a Supa a likunutu zesupa lika yo kwaluha.”

¹⁷⁷ Ki luna ba, fa kacenu, lwa utwisisa *Peu Ya Noha*. Mwa mazazi alikani, haiba Mulimu alata, luka utwisisa swanelo ka za *Manyalo Ni Telekano*. Ni lika ze kaufela za kwaluzi Mulimu, Liswayo lifi kaufela, likunutu kuzwa kwa simuluho ya lifasi. Mi lubile mwa tabo, Kubateni kwa limbuyoti za Hae! Yani ki niti. Zazi le, Liñolo le!

¹⁷⁸ Ba mutende wa *Life* magazine ne bañozi taba yateni kuli, “Sikwenda sa Liseli la kunutu si pahama mwa halimu fahalimwa Tucson ni Phoenix,” mwa mukwa o swana o ne Ni mi bulelezi mwendi silimo zani li si ka ezahala kale, mo ne li ka bela, mi inge siswaniso sa maneku amalalu. Siswaniso sani si pahekilwe mwa keleke kwani. Mina bene ba ngile mutende wani muna ni sona. Nesiliteni mwani, ona cwalo fela hande. Ne ba ize kuli, “Ki limaili ze mashumi amabeli ni zesupa mwa halimu ni limaili ze mashumi amalalu mwa bukima.” Haba utwisisi sene si ezahalile. Ne si bonahalile ka kunutu ni kuikela ka kunutu.

¹⁷⁹ Muzwale Fred Sothmann, Muzwale Gene Norman ni Na, ne luyemi kwani. Kuna ni bupaki. Sina mwa Na kambamezi fa halimwa lilundu; Pitrosi, Jakobo, ni Joani, kwa kufa bupaki. Ne bayemi kwani ni ku li bona hane liezahala, mi ba libona hane li ezahalile.

¹⁸⁰ Ki Sani faale, sa lepelela mwa mbyumbyulu; kutofita fa, hakuna mukamo, hakuna kubatelwa kamba sesiñwi sa kueza kuli kube—kube mbundu. Kana ne lika taha cwani kwani? Neli Mangeloi a Mulimu ha na sweli kukuta, kasamulaho wa Liñusa la ona. Zazi le sipolofita sani si talelelizwe mwahala luna. Zazi le Liñolo le li talelelizwe.

¹⁸¹ Mutualime, Maswayo Asupa a kwaluhile. Kakundukundu ka inzi kwa Likamba la Wiko. Cwale, musike mwa mbwinja se, sina mo ne kuezahalezi kwa mulaho kwani.

¹⁸² Cwale, kutwisiso ya luna, bukaufi nyana ni lizazi la luna. Kana Mañolo abulela sikamañi ka lizazi la kacenu, ni ka nako ye lupila ku yona? Jesu wa bulela... Hanina kuba ni nako ya ku linga kaufela zona, kono Ni bata kunga ye inosi lusika kwala kale.

¹⁸³ Jesu na bulezi kuli, ku Muñoli Luka kauhanyo yabu 17, timana ya 30. Jesu Kreste, yena Linzwi Kasibili! Kana mwa lumela cwalo? [Puteho ili, “Amen.”—Mu.] Jesu Kreste, yena Linzwi Kasibili, yana eizizwe nama, na bulezi mi ali Linzwi likaba cwalo mwa nako ya maungulo, se si kaba sisupo sa kufela kwa lifasi. Na ba bulelezi kuli naha ika Iwanisa naha yeñwi, kono

Na bulezi kuli, "Sina mo ne kuinezi mwa mazazi a Sodoma, kona mo ku kabela mwa lizazi fo Mwana mutu ha sa patuluuhile."

¹⁸⁴ Cwale, Jesu hana tile mwa lifasi, Na tile mwa libizo la Bana babalalu. Mwana mutu, yali mupolofita; Mwana Mulimu; ni Mwana Davida.

¹⁸⁵ Cwale, Na pilile mwa lifasi mo. Na si ka bulela kuli Nali Mwana Mulimu. Na ize, "Ni Mwana mutu." Jehova yena Kasibili na bizize Ezekiele ni bapolofita kuli, "Mwana mutu." Kakuli, Nana ni kutaha ku to talezeza Mañolo ka kuba mupolofita. Mushe naize, "Mulena Mulimu wa mina uka zusa Mupolofita ya swana sina na." Lani kona libaka ha Na sika ba Mwana Mulimu kwani, kakuli Na li Mwana mutu. Yena... "Linzwi nelitile kwa bapolofita." Mi Na li yena Linzwi mwa mutalelala wa Lona. Mwana mutu, yena—yena mupolofita yomutuna... Isiñi mupolofita yomutuna, kono ki Mulimu-Mupolofita, "Mutalelwa wa Bumulimu ka mubili noli ku Yena." Kabakaleo, Nali Mwana mutu.

¹⁸⁶ Cwale, ka lilimo ze likiti zepeli ze, U zibahalile ku luna kakuba Mwana Mulimu, Moya.

¹⁸⁷ Mi mwa Mileniamu, Ukaba Mwana Davida, fa Lubona. Luna kaufela lwa ziba cwalo, baba lumela Mañolo.

¹⁸⁸ Cwale, Jesu nabulezi kuli, ona kwa mafelelezo a lusika lwa keleke yelupila ku yona ye, kuli, "Mwana mutu uka patululwa hape mwa mukwa o swana sina mo ne kuinezi, sina mone kuinezi mwa Sodoma."

¹⁸⁹ Mutualime mokuinezi, kuya ka litaba za kale, Na li file. Na bulezi kuli, "Sina mo ne kuinezi mwa mazazi," pili, "ka Nuwe, mo ne ba cela, kunwa, kunyala, kunyalisa." Mi A tisa, se sitatama, za mafelelezo, ku Mwana mutu, kwa Sodoma. Kakuli, kwani Na sweli kutalimana ni Majuda; fa, kwa Sodoma, U talimana ni Bamacaba. Kwani, Na ba nwelisize ka mezi, mwa katulo; fa, ku Bamacaba, Na li cisize kaufela zona ka zazi lani mwa Sodoma. Yani ki niti. Lifasi la Bamacaba ne li cile kwani, "mi ona cwalo kona mo ku kabela fo Mwana mutu haka patululwa." Ha isali mezi ni hanyinyani, kono ikaba mulilo ka nako ye. Jesu na balile kuzwa Genese 23 mo lu balile, fani ha Na balile ka za Sodoma.

¹⁹⁰ Cwale, lu itumelela buino bo ne bu bulezwi, ka buino bwa lifasi bwa Sodoma, Masodoma, buino bwa Sodoma. Luna, mañi ni mañi, lu ka bulela kuli "amen" ku sani. Lwa lumela cwalo. Ku lukile.

¹⁹¹ Mi buino bwa moyo bwa Laodesia, keleke ya nama, luka bulela kuli "amen" ku sani, ni kuamuhela lisupo za yona. Lu ziba sisupo kaufela siteni kwani. Keleke iinzi mwa Laodesia. Lwa ziba cwalo. [Puteho ili, "Amen."—Mu.]

¹⁹² Lwa ziba kuli lifasi li mwa buino bwa Sodoma. Kana ki niti yeo? [Puteho ili, “Amen.”—Mu.] Luka amuhela sani.

¹⁹³ Kono kucwani ka sisupo sa Abrahama, sona sa kulibeleta mwana wa sepiso? Yani neli yeñwi.

¹⁹⁴ Muhupule, neba na ni Sodoma kwamulaho kwani; neba nani mulumiwa wa bona. Mi Abrahama nana ni Mulumiwa ku yena.

¹⁹⁵ Abrahama na libeleta, zazi ni zazi, kakuli, neli nto ye tata kwa ku ezahala. “Sarah, nainte, mi yena ze mwanda.” Kuya ka sepiso Mulimu, na sa libeleta. Mwahala ku kananisiwa kaufela, na sweli kulibeleta mwana yani.

¹⁹⁶ Kona mwainezi ni mulumeli wa niti ya sa libeleta Mwana wa sepiso yani kuli akute! Mulemuhe, ona fani mwana asika fita kale, nekuna ni sisupo sene si filwe ku yena. Kana ha ki sisupo sa kutaha kwa Mwana ya ka patululwa kwa Peu ya Silena ya Abrahama ye libeleta Mwana wa Silena, ka kuswana sina mo ne kuinezi ku ndate Abrahama ka mwana wa nama? [Puteho ili, “Amen.”—Mu.] Ki niti yeo njii? [“Amen.”] Jesu na bulezi cwalo, mo ku Muñoli Luka 17:30, “Nako ye isika taha kale, kuli, Mwana mutu uka patululwa sina mwa Na ezelize mwa mazazi a Sodoma, kusikaba kale sinyeho ya Sodoma.” Cwale lu bata sisupo.

¹⁹⁷ Cwale halungeni buino bwa nako sina mo ne buinezi mwa Sodoma. Mulemuhe, kaufela bona ne ba keni mwa mwa buino bwa Sodoma, lona lifasi.

¹⁹⁸ Ni sepa alimuñwi wa bazamaisi ba mafilimu yana beilwe fa siswaniso, ha ki kale hahulu, mi Ni nani ku si bona, yani neli, *Sodoma*. Haiba mukona ku si bona mi hakuna sisile kwanda ona sani, mu si talime. Sona luli ki siswaniso sesinde sa ba United States kacenu, Hollywood, ona cwalo fela; mufuta o swana wa mutinelo ni lika kaufela ze ne ba eza ka swanelo nako yani; mikiti yemituna ya macwala ni lika zeñwi kaufela, batu ba tuto yeñwi ya bulapeli, yebizwa kuli ya bulapeli.

¹⁹⁹ Mulemuhe, ni Sodoma neina ni paki, mi neli mutangana ya bizwa Lota, yanali mwana kezela—kezela Abrahama.

²⁰⁰ Cwale, Abrahama na si kaya kwa Sodoma, nana ni sikuwata sa hae. Nana ni sikuwata sesituna ku yena, sene si kona ku lwanisa malena baba lishumi ka bababeli ni mpi ya bona. Kacwalo, nana ni sikuwata sesituna ku yena. Mi nainzi kwani mwatasa kota ya oke, zazi leliñwi, fani lika kaufela hane li sweli ku fosahala ku yena; hakuna yana na ni sa kueza ni yena, kono yena na sa swalelezi kwa sepiso yani.

Mutalime cwale, ka tokomelo, lu si ka kwala kale.

²⁰¹ Hana sa inzi fani, se kutaha baana babalalu, inge bazamaya kutaha ku yena. Bababeli ba bona ba shetumukela kwa Sodoma ni ku yo kutaza Evangeli ku bona, la kuzwa, lu Lota. Kana ki niti yeo? [Puteho ili, “Amen.”—Mu.] Kono Alimuñwi na siyezi ni

Abrahama. Mulemuhe, Yena ya an inzi ni Abrahama neli Mulimu Kasibili. Bababeli bani neli balumiwa ba Mangeloi.

²⁰² Cwale, kwani mwa Sodoma, ne ba si ka eza makazo ni yekana, kwanda ku ba nata fela ka bubofu. Mi kukutaza Evangeli kamita ku ba beyanga mwa bubofu.

²⁰³ Cwale mutualime ka buino bwa lizazi lani. Kuna ni keleke ya nama. Kamita mwa likalulo zetalu, sina hane Ni bulezi busihu bwa maabani, Mulimu wa yemelwa. Nekuna ni Masodoma; baha Lota; ni baha Abrahama. Li mwa mukwa o swana busihu bwa kacenu, lifasi liinzi ona cwalo.

²⁰⁴ Mutuhele ni mi buze ngo yeñwi. Mutualime fa buino bo cwale. Abrahama na bizize Muuna yo yana ambola ni yena kuli, “Elohim.” Linzwi la Siheberu leo *Elohim* litalusa kuli “Ya ikonela lika kaufela, Yena Yali wa Kuyakuile,” Elohim, Mulimu Kasibili!

²⁰⁵ Kwa simuluho, Genese 1, ili, “Kwa simuluho Mulimu...” Munge linzwi la Siheberu fo, kambe, ki linzwi la Sigerike, nitaluse, “Kwa simuluho *Elohim* na bupile lihalimu ni lifasi.”

²⁰⁶ Fa, Yena, mwa Genese, mwa 22 mo, U bulela hape kuli, kamba—kamba ya 20, Ki hali, mi abiza Muuna yo libizo la “Elohim.” Kiñi ha na ezize sani? Mulimu, inza yemezwi mwa mubili wa nama, yena yana inzi ni Abrahama ni kuca sinkwa sa nama, kunwa mabisi nyana, ni kuca sinkwa nyana. Mulimu Kasibili, ni kulikelela fapila Abrahama.

²⁰⁷ Kono Na mu file sisupo. Mulemuhe. Mi sisupo sani neli kuli Na fulalezi mukokoto wa Hae kwa tende.

²⁰⁸ Mi muhupule, Abrahama, libizo la hae neli *Abrame* mazazi nyana kwa mulaho, mi Sarah ne li *Sarra* kwa mulaho nyana kwani; S-a-r-r-a kasamulaho aba S-a-r-a-h, ni A-b-r-a-m kuba A-b-r-a-h-a-m-a. *Abrahama* italus “ndatahe macaba.”

²⁰⁹ Cwale mutualime hande ka tokomelo fa, mi lu ka bona buino bwa hola ye lupila ku yona, sina Jesu hana lu bulelezi kuli latalime fa buino. Lu boni zeñwi za zona kaufela hande; cwale halu boneni Peu ya silena, buino bo ba lukela kubona.

²¹⁰ Cwale Muuna yo ali, “Abrahama, uka musala hao, Sarah?”

Mi Abrahama ali, “U inzi mwa tende, kwa mulaho wa Hao.”

²¹¹ Cwale, Asamba kuba a mubobe fateni. Kana Na zibile cwani kuli libizo la hae neli *Abrahama*? Kana Na zibile cwani kuli libizo la hae neli S-a-r-a-h? “Abrahama, ukai musala hao, Sarah?”

Ali, “U inzi mwa tende, kwa mulaho wa Hao.”

²¹² Ki hali, “Na . . .” “Na,” tulokandina twa mutu. “Ni ka ku potela kuya ka sepiso. Musala hao ukaba ni mbututu yani. U Ni sepile, cwale Ni ka eza kuli zeo liezahale.”

²¹³ Mi Sarah, mwa tende, kwamulaho, kuteeleza ka ku shaamena kamba kubandamina, mo mu li bizeza kaufela, inza teeleeza mwa tende, na tabezi kwa mukunda, mi abulela kuli, “Cwale, na, nili musali ya supezi sina mo Ni inezi, ni be ni munyaka ni mulena ka; mi ni yena usa supezi, ni yena, kwande kwani una ni myaha ye mwanda ya kupepwa? Kanti, taba ye ha isika ezahala kale lilimo zeñata, ñata cwalo.”

²¹⁴ Mi Muuna yani, M-u-u-n-a, yana inzi fani inza ca, mwa nama ya butu, kunwa ni kuca inge mutu ya swana fela ni babañwi; ni maluli fa liapalo za Hae, mi nana ni maluli kwa mautu a Hae, mi Abrahama a mu tapisa ona. Mulimu, Kasibili, atalima kwa ni kwa, mi ki Hali, “Kini Sarah ha sehile, kwa mulaho mwa tende, ka kubulela *cwalo*?” Na zibile, na konile ku lemuha milelo ya Sarah mwa tende, kwa mulaho wa Hae. Ki niti yeo? [Puteho ili, “Amen.”—Mu.]

²¹⁵ Cwale, fani Peu ya Silena ya Abrahama hane itile mwa lifasi, ki sisupo mañi sa Na bonisize, Mwana mutu. Simoni natile zazi leliñwi ku Yena; Andreasi na mu tisize. Abulela kuli, “Libizola hao ki wena Simoni. Wena u mwana Jonasi,” Abulela kuli. Mwabona, sani ne si ezize mulumeli ku yena.

²¹⁶ Filipi naile ku yo biza Natanaele; ayo kuta, ali, “Taha, uto bona Muuna Yo lu—lu fumaní; Jesu wa Nazareta, mwana Josefa.”

²¹⁷ Ki hali, “Cwale libelela fa muzuzu. Kana kuna zende zekona ku zwa mwa kufiteleza kwa tumelo kwani?”

Ki ali, “Taha, utobona.”

²¹⁸ Kona kuli Filipi hana tile Fapila Jesu, ni Natanaele, Jesu amu talima mi ali, “Amubone Muisilaela ya sina ñole ku yena.”

Ki hali, “Muluti, U ni zibile lili?”

²¹⁹ Ali, “Mane Filipi asi ka ku biza kale, fani ha no li mwatasa kota, Ne ni kuboni.”

²²⁰ Ki hali, “Muluti, Wena u Mwana Mulimu. Ki wena Mulena wa Isilaele!”

²²¹ Fani musali yomunyinyani yani fa lisima, mwa buino bwa hae bwa kusa ipuluka, hana tile, neli taba yene bonahalela fahule nyana cwalo, ku yo ka mezi. Jesu na lumile balutiwa ba Hae kusili, ku yo leka lico ni lino. Fani hana tilo ka mezi, Yena ali, “A ku Ni fe kwa mezi, musali.”

²²² Musali ali, “Ha ki swanelo kuli Wena ubulele cwalo. Luna ni ketululo kwanu. Cwale, mina Majuda hamuna sa kueza ni luna Masamaria; haluna sa kueza ni mina.”

²²³ Abulela kuli, “Kono, musali, kambe wa ziba Yo bulela ni yena, no ka Ni kupa mezi. Ne ni ka kufa mezi akuli hauna ku taha kwanu ku to ka mezi ni kamuta.”

²²⁴ Na mufumani fone kuinzi buino bwa hae, seo nesili sona. Abulela kuli, “Zamaya u yo biza muuna hao mi mutahe kwanu.”

Musali ali, "Hanina muuna nihaiba alimuñwi."

²²⁵ Yena ali, "U bulezi niti. Ubile ni ba ketalizoho, mi yena yo pila ni yena cwale ha ki muuna hao."

²²⁶ Musali ali, "Muñaka, Ni lemuha kuli Wena u mupolofita. Lu ziba kuli Mesia ha sa tile Uka lu bonisa lika ze."

Jesu ali, "Kina Yena."

²²⁷ Ku sani, musali amatela mwa munzi mi ali, "Amutahe, mu to bona Muuna Ya ni bulelezi lika ze Ni ezize. Kana yo ha ki yena Mesia luli?"

²²⁸ Mutualime, Na ezize sani fapila Majuda, ni Masamaria, kono isiñi ku Bamacaba. Bamacaba, luna batu, neluli bahedeni mwa mazazi ani, linaha zeñwi, kubeya katengo kwa mukokoto wa luna, kulapela milimu. Ne lu sa libeleli Mesia ufi kaufela.

²²⁹ Yena ubonahalanga fela ku baba Mu libelela, mi luswanela ku no Mu libelelanga.

²³⁰ Kono bani bene ba ipapata kuli ne ba Mu libelezi, yona keleke kasibili, hane ba boni sani ha si ezwa, ba bulela kuli, "Ki diabulosi. Ki mulauli, ki Baalezebubi!"

²³¹ Mi Jesu ali, "Sibi sani ne ba ka si swalelwa," kakuli Na si ka shwa kale. "Kono," ali, "zazi leliñwi Moya o Kenile ha u ka to eza lika zeswana, mi kubulela linzwi la kulwanisa Sani halina ku swalelwa." Lani kona lizazi le, koo Linzwi kaufela lina niku zamaelela hamoho. "Kubulela linzwi la ku Li lwanisa; ha lina ku swalelwa mwa lifasi le kamba lifasi le litaha."

²³² Yani kona Peu ya Silena ya Abrahama. Mi fa Peu yani ya Silena ya Abrahama, ye taha bakeñisa zibahazo yani ya Muuna yani yana inzi ni Abrahama, kwani, ne itilo paka kuli neli Mulimu ya swana, yana sepisa mwa lizazi le kuli, "Ona mo ne kuinezi mwa mazazi a Sodoma, kona mo ku ka bela ha taha Mwana mutu, fani ha Ka ipatulula Iliyena kuba Mwana mutu." Amen. Zazi le Liñolo le li talelelizwe.

²³³ Mutualime fa buino bo luli ka bona kacenu. Mutualime fa keleke yeo Mwana Mulimu... Mutualime fa lizazi le lisabissa. Mutualime fa bupolofita kaufela. Cwale, taba ye nca, baenyi ba luna ba swanelia ka nako yeo, haiba buino buna ni kuba sina kwa Sodoma.

²³⁴ Nekuna ni babalalu ba kubona bene ba taha, baana babalalu bene ba lumilwe kuzwa mwa Lihalimu. Luka itumelela sani. Babalalu ba bona; Alimuñwi na inzi ni Abrahama. Kaufela bona ne ba kalezi kwani, kono Alimuñwi na inzi ni Abrahama. Babañwi ba ku bona ne baile kwa Sodoma. Kana ki niti yeo? [Puteho ili, "Amen."—Mu.] Mi Abrahama na cincizwe libizo, kuzwa ku Abrame kuba Abrahama. Niti? ["Amen."]

²³⁵ Hakuna nihaiba nako iliñwi fo litaba za kale, keleke ya lifasi, ha ikile yaba ni mubuleli yana ile ku yona, yana ni libizo le lifela

ka h-a-m, kufitela lizazi le, Billy G-r-a-h-a-m. Kana ki niti yeo? [Puteho ili, "Amen."—Mu.] G-r-a-h-a-m, ki litaku ze silezi. A-b-r-a-h-a-m ki litaku ze supa. Kono G-r-a-h-a-m ki litaku ze silezi, yeli lona lifasi, mutu. Mwabona?

²³⁶ Mutualime zeile kwande kwani, kacenu, kona balumiwa bani babazwa kwa Lihalimu.

²³⁷ Kana kuna ni muuna mwa lifasi yakile a kutaza kubaka ka swanelo hande inge Billy Graham? Kana kubile muuna yakile aba ni susumezo hahulu fa batu, sina Billy Graham? Kwali kuba nihaiba yomukana, kwa lifasi kaufela, muuna yani. Oh, Billy Sunday, ni babañwi cwalo, naliteni mo mwa United States, ko Billy Graham wa zibahala lifasi koliya ko likuwa. Mwabona kwa sweli kubiza? Kuzwa mwa Sodoma.

²³⁸ Mi una ni kakwata ka hae kaka zamaya ni yena ni keleke ya ba Pentekota, yena Oral Roberts.

²³⁹ Kono kucwani he ka sikuwata sa Baketwa? Ki mufuta wa mañi so ba lukela kubona? Ki sikamañi se ba lukela kuba ni sona? Haleluya! "Ku kaba Liseli mwa nako ya swalala ya manzibwana." Zazi le Liñolo le li talelelizwe. [Puteho ya nyakalala—Mu.] Zazi le sepiso ya Mulimu i talelelizwe. Lu ziba kuli yeo ki Niti. Utensi mo busihu bo sina ha Na li kwani.

²⁴⁰ Cwale, ka ku kutaza sani, se Ni bulezi fa nako nyana yefitile, haiba mu kutaza sika kaufela mi ki Niti ya Evangel, kona kuli Mulimu u tamehile ku si paka sani. Ki niti yeo njí? [Puteho ili, "Amen."—Mu.] Cwale, haiba seo si cwalo, mutuhele Mulimu yana ñozi Linzwi, mutuhele Mulimu yana file sepiso, mutuhele Mulimu yali yena Mulimu wa Linzwi, atahe mi apake kuli Usali yena Mulimu.

²⁴¹ Sina Elia hanaile fahalimwa lilundu; inza talima, Elisha na talima Elia, mi ali, "Ni bata kabelo ya liemba zepeli." Mi kubo yeneli ku Elia ya wela ku Elisha. Aya inza shetumuka, mi aeza kubo yani habeli ni kunata fa nuka, mi ali, "Ukai Mulimu wa Elia?" Mi taba yeswana yene ezahalile ku Elia, ya ezahala ku Elisha.

²⁴² Mi Evangel yeswana, ona Mata aswana, yena Mwana mutu yaswana yanali maabani, u cwalo kacenu, mi ukaba cwalo kuyakuile. Maheberu 13:8. Kana mwa Li lumela? [Puteho ili, "Amen."—Mu.] Cwale, Na mi buza. Na hanikoni kuba Yena, kono Yena utensi mo. ["Amen."] Luna lu balwali fela.

²⁴³ Mina batu babañwi kwande kafoo, baba kula ni kuimelwa, mi muziba kuli ha Ni mi zibi, mutuhele Mulimu cwale...haiba Ni kona kuikokobeza ilina ka swanelo. Mu lapele mi mubuze Mulimu.

²⁴⁴ Hani kakanyi...Hakuna nihaiba kadi ya tapelo mwa tuyaho, kana iteni? Batili, Ha ni sepi...Halu si ka fa kadi ya

tapelo ni yekana. Luka ba ni mukopano wa kulapelela kwa . . . kamba kufoliswa kwa bakuli, kwa keleke. Kono, mu lapele.

²⁴⁵ Mi mwa ziba kuli Ni muenyi luli ku mina. Mwabona, mwa ni ziba, Jeffersonville! Hani lati kuli batu ba mwa Jeffersonville baeze sani. Ni bata batu babazwa kusili kokuñwi fela. Mubone haiba nji Mulimu u sa patulula! Mwabona haiba U sali yaswana maabani, kacenu, ni kuyakuile!

²⁴⁶ Mueze sina musali yani mwa na ezelize. Na fitile kwani, mi musali ali, "Na mu lumela Muuna yo." Nana ni butata bwa mali, mi ki hali, "Kambe Ne ni ka swala fela mungundo wa sapalo sa Hae, Ni lumela kuli Ni ka fola." Ki niti yeo?

²⁴⁷ Bakeñisa tumelo ya hae, zazi lani, Liñolo ne li talelelizwe. "Na tamile lipilu za baba lobehile lipilu, na folisize bakuli ni lilanga."

²⁴⁸ Fani ha na sweli kwa mungundo wa Hae, mi aya ayo ikinela, Afetuha ni kubulela kuli, "Ki mañi ya Ni sweli?" Kana Na zibile cwani, mwahala nyangela tuna ya batu bani, mwendi babali mwahali mo baka kena kubona ka mashumi amalalu busihu bo, ma sauzandi abona? Kana Na zibile cwani zani? Na bulez kuli, "Ki mañi ya Ni sweli?" Na si ka bulela sani ka mukwa wa kubulela fela; Na bulezi cwalo kakuli neli niti. Mi ki Ha bulela kuli, "Ki mañi ya Ni sweli?" Mi ona fani A talima kwa ni kwa ni kubona musali yomunyinyani yani, fana inzi kamba kuyema, mufuta kaufela wanali ka ona, amu bulelela kuli butata bwa hae bwa mali ne bufelile.

²⁴⁹ Yani neli Jesu maabani. Yani ki Yena kacenu. Mwa lumela cwalo? [Puteho ili, "Amen."—Mu.]

²⁵⁰ Hani ku zibi; Mulimu wa ku ziba. Kono una ni kuopa mwa makupo, seo sa kukataza. Yani ki niti. U inzi fo mi wa lapelela fateni. Kana Ni muenyi ku wena, mi kikuli lu baenyi ku yomuñwi ni yomuñwi? Aku yeme, haiba ku cwalo. Ha ni ku zibi. Ki yena muuna *yo* yali fa lilulu le, yena mutangana *yo*. Ni wena una ni butuku fa mumizo. Yani ki niti. U sweli ku lapelela ona zeo. Usweli kuikalelwa ka taba yeñwi. Ukaba ni kuzwa mwa mukopano kakuli, u mukutazi, una ni mipateho yeñwi yo lukela ku yo talima. Yeo ki niti. Uh-huh. Wa lumela kuli Mulimu wa ziba *yo* uli yena? Rev. Bo Smith, cwale zamaya u *yo* fola. Jesu Kreste uku folisize. Zamaya kwa mukopano wa hao; mumizo wa hao hauna ku ku kataza.

Na sweli mañi?

²⁵¹ Kuna ni muuna ya i nzi kwa mulaho *kwanu*; usweli wa nyanda. Una ni kansa kwa liswafu la hae la nzohoto. Ha ezi . . . Ha zweleli kwanu. No li mubeleki wa mwa mikoti. Yeo ki niti. Na ni muenyi luli ku wena. Haiba nji yeo ki niti, nyanganyisa lizoho la hao. Kansa inzi mwa liswafu la hao la nzohoto, mi uya kwa kupazuliwa ona cwanoñu fa. Ki niti yeo? Ha uzwi kwanu. U zwelela kwanda tolopo. U zwelela kwa Virginia. Yani ki niti. Wa

lumela kuli Mulimu wa ku ziba? Bo Mitchell, yani ki niti, zamaya kwandu mi ube hande. Jesu Kreste u ku folisize. Mubuze muuna yani! Nali kuba ni mubone, mwa bupilo bwaka. Na inzi fani, inza lapela.

Zazi le Liñolo le!

²⁵² [Muzwale Branham usikululela mukokoto wa hae kwa kopano—Mu.] Ki yo fa kalibe yainzi kwa mulaho wa ka kwanu, kwa mulaho waka, sina Sarah mwa na inezi mwa tende. Uswelii ku lapelela mwana musizana. Aku yeme. Musizana yo haayo mo; uinzi khahule, yena mwana musizana yo. Mi uya swana sina mo ne kuinezi fani musali yani hana tile ku Jesu, yana bile ni musali yana katazwa hahulu ki diabolosi. Musali yo ki... musizana nana ni moyo wa madimona. Haayo mo. U zwelela kwa... Uzwelela kwa North Carolina. Wa lumela cwalo? Mi yeo ki niti, nji cwani? Musala bo Orders, wa kona kuya kwandu. Haiba nji ulumela ka pilu ya hao kaufela, uka yo fumana mwana hao inge mwa na fumanezwi ku Jesu Kreste mwa mazazi a kwa mulaho, kuizwe na folisizwe.

²⁵³ Zazi le Liñolo le; sisupo sa Sodoma, sisupo sa Peu ye ipitezi, sisupo sa keleke ya nama! Zazi le Liñolo le li talelelizwe mwahala mina. Kana mwa lumela cwalo nji? [Puteho ili, “Amen.”—Mu.]

²⁵⁴ Kana mu ka Mu amuhela cwale ka kuba Mupulusi wa mina ni mufolisi? Amu yeme, mañi ni mañi wa mina, muli, “Na amuhela foliso ya ka. Na Mu amuhela kakuba Mupulusi wa ka. Na Mu amuhela kakuba Mulena ka.” Mañi ni mañi mu yeme cwale.

Zazi le! Muteeleze, balikani.

²⁵⁵ “A bala Liñolo, atambeka Bibele ku muprisita, mi,” ali, “meeto kaufela a sicaba na ndwandukela ku Yena. Mi A ba talima, mi ali, ‘Zazi le Liñolo le li talelelizwe.’”

²⁵⁶ Ni balile Liñolo, ka bupaki bo bu twelufu kamba kufitelela bwakuli lupila mwa lizazi la mafelelezo, lona lusika lo lu ka bona Jesu Kreste hakuta mwa lifasi. Mi Ni li ku mina busihu bo, hape, mwa lizazi le Liñolo li talelelizwe mwa meeto a mina.

²⁵⁷ Mina mwa Tucson, mina mwa California, mina mwa New York, fa mihala ya mawaile, zazi le Liñolo le li talelelizwe mwa meeto a mina.

²⁵⁸ Halu tabeni mi lu nyakalale, kakuli Linyalo la Ngunyana li fa kaufi, ni Munyaliwa wa Hae... Munyaliwa wa Hae u i tukiselize kale Iliyena.

²⁵⁹ Halu nanuleñi mazoho a luna ni ku Mu fa kanya, kaufela mina sicaba. Mulimu ami fuyole. [Puteho izwelapili ku nyakalala ni kulumba Mulimu—Mu.]



ZAZI LE LIÑOLO LE LI TALELELIZWE LOZ65-0219
(This Day This Scripture Is Fulfilled)

Liñusa le ka Muzwale William Marrion Branham ne li kutilizwe lwa pili mwa Sikuwa la Bufaifi manzibwana, Yowa 19, 1965, ili fa Parkview Junior High School mwa Jeffersonville, Indiana, U.S.A., liingilwe kuzwa fa tepu ya magesi ya manzwi kusina ku zusa sika mwateni ku ya Sikuwa. Toloko ye ya mwa Silozi ne i hatisizwe ni kuhasanyiwa ki ba Voice Of God Recordings.

LOZI

©2017 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Zibiso ya bahatisi

Litukelo kaufela li bulukilwe. Buka ye yakona kupulintwa fa pulinta ya mwa ndu kuli iitusiswe ki mutu kamba kuli ifiwe ku yomnwi, mahala feela, kakuba siitusiso sa ku hasanya Evangelí ya Jesu Kreste. Buka ye hailekiswi, kuatiswa mwa buńata, ku nepelwa fa moyá wa webusaiti, ku bulukwa mwa mukwa wo bunolo, ku tolokwa mwa mishobo isili, kamba ku itusiswa kwa kukupa masheleńi ku sina tumelelano niba Voice Of God Recordings®.

Ka litaba zeńata kamba ka libuka zeńwi ze liteni, shangwe muńolele kwa:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org